

JUAN

É Mbamba Fwéñ Apostol Juan a ngá tsili

Éfía ye éniŋ

- 1** ¹ Átáraga, Efía é mbé é tɔ́.
Efía é mbé é tɔ́ bá Nzamá.
Efía fe é mbé Nzamá.
- ² Éñí te a mbé á tɔ́
bá Nzamá átáraga.
- ³ Mam mése mé ngá tɔ́ɔ mbɔann amú Éñe,
éde kaa ki Éñe dzóm enziŋ ye é ntɔ́ mbɔann,
deé ndzí tɔ́ɔ mbɔann.
- ⁴ Éñe eniŋ é mbé é tɔ́ ébe éñe,
eniŋ te é mbé éyéá bot;
- ⁵ eyéá te dá feañ á dzíbi été,
ve dzíbi dá kaa dɔ ádzím.
- ⁶ Mot enziŋ aá sɔ́, a tɔ́ eyola ná Juan,
Nzamá éñe aá lóm ñí.
- ⁷ Mot te a ngá sɔ́ amú ngañiá,
á mfá ye ná á vé é ngañiá eyéá te,
ná ébe éñe bot bése bé bwíni.
- ⁸ Se mot te émyen éñe a mbé eyéá,
fáve ná aá sɔ́ á mfá ávé
é ngañiá eyéá te.
- ⁹ Éñí te, éñe a mbé é bébélá eyéá
é sɔ́ yaá éniŋ dzí, aa feañ fe ébe mot binam áse.

- 10 A mbé a tɔ́ éniŋ dzí,
eniŋ dá dá tɔ́bɔ fe mvelann amú éñe;
ve éniŋ dzí deé ndzí ñí yem.
- 11 Aá sɔ́ ébe áabyeñ émyen,
ve áabyeñ bíte bí ndzí ñí ñɔŋ.
- 12 Ve, ébá bése bé ngá ñɔŋ ní,
ébá bá bwíni éyola deñ,
ébó, ñí a ngá vé nguu ye ábelé étɔ́ bwán Nzamá,
- 13 ébá béte bé sés mbyálánn ákála mékií,
ngé ki amú nkómánn mot binam,
ngé ki nkómánn fám enziŋ,
ve fáve nkómánn Nzamá.

- 14 Ané Éfíá te é ngá sùgan bɔ mot binam,
é sɔ́ tɔ́bɔ énzénzanŋ dea.
Éde bía bí yén yaá fe é dúmá deñ,
dúmá ané édí é Mwán mbɔ́ɔ́ ya mbɔ́ɔ́ Éséá,
ndzálánn ya mvɔ́mm ya fe bébélá.

15 Juan a ngá vé ngañiá á mfá weñ, eé kɔ́bɔ ya kíŋŋ oyaáp ó yóp éde a ngá dzó ná, “Éñí, éñe a ne é mot me ngá dzó ya ñí ná, ‘Éñí a mbé ná aa nzu ma á mvús, éñe a sùgan yaá ma bɔ ósú. Amú ná a mbé a tɔ́ kaa ná me bɔ.’ ”

16 Ákála ná, ébe ndzálánn abóm deñ, bía bésesé bí ñɔŋ yaá é mvɔ́mm ñí ya éñí fɔ́ɔ́. 17Dá é tɔ́ ná bá kee nkɔ́ɔ́ métsiŋŋ ébe Moisés, ve mvɔ́mm ya bébélá byá bí sɔ́ yaá amú Yesukristo. 18Mot enziŋ áá bé yén Nzamá eyɔŋ enziŋ; ve é Mwán mbɔ́ɔ́ ya mbɔ́ɔ́ a yága Éséá ó twíñ, éñe a lére yaá ñí.

É ngañiá Juan ndubot

19É ngañiá Juan éñe ñí éyɔŋ bejudio bé ngá lóm befára ya belevita á Yerusalen ná bé ke ñí ásílí ná, “O ne nzá?” 20Ané a ngá mem, kaa ákat. Éde a ngá mem eé dzó ná, “Se ma me ne Kristo.”

21Ané bé ngá sílí ñí ná, “Éde ya? Ye wa o ne Elías?”

Ané ñí a ngá dzó ná, “Me sés ñí.”

“Ye wa o ne nkúlu medzó te?”

Ané a ngá yalan ná, “Kaa.”

22Véa éñe bé ngá sílí ñí ná, “Wa o ne nzá, á mfá ye ná bí ke vé é bot bé lóm bía eyalann, wa dzó á mfá wámyen á yá?”

23Éde a ngá yalan ná,

“Ma mé ne kíŋŋ, éñí da yónán éyáŋŋ été ná,

‘Sónánán é nzenn Ntí,’

amvála ané nkúlu medzó Esaía a ngá dzó.”

²⁴É bot bé ngá sɔ́, milómán míte mí ngá sɔ́ ébe befariseo. ²⁵Ané bé ngá síli ní ná,

“Éde amú dzé wa du bot ngé o sés Kristo, ngé Elías, ngé ki nkúlu medzó te?”

²⁶Ané Juan a ngá yalan ya bó ná, “Ma du bot ya mendzím; ve énzézanɔ́ denan, mot enziɔ́ a ntéle, éní míni ne kaa áyem. ²⁷Aa nzu ma á mvús, [éne a ne kaa ané mé bɔ́], éní dáá ñep ya ma ná me tsii ní mikóó mengop.”

²⁸É mam má, mé ngá bɔ́ban á Betania á Yordán áyát, é vóm Juan a ngá bɔ́ eé du bot.

É mwann ntómá Nzamá

²⁹É mos ó ngá belan véa, Juan eé yén Yesus ná aa nzu ébe éne, á nga dzó bot ná:

Yénɔ́nán é mwann ntómá Nzamá aa vea mísémm bot béye é sí ní, éne ní. ³⁰Éne me ngá dzó ya ní ná, “É mvús dam mot aa ye sian, éne a súgan yaá ma bɔ́ ósú, amú ná a mbé a tɔ́ kaa ná me bɔ́.” ³¹Méé ngá yem ní, ve á mfá ye ná ánzú léreban Israel été, édo me ngá nzu ma du bot ya mendzím.

³²Juan a ngá vé fe ngañiá, eé dzó ná, “Me yén yaá Mfúfúp Nsísim eé sigi á dzóp a sɔ́ berebe ébe éne, eé yéne ané obeɔ́ɔ́. ³³Éde, méé ngá yem ní, ve éní a ngá lóm ma ná me nzu ma du bot ya mendzím éne aá dzó ma ná, “É mot wa ye yén Mfúfúp Nsísim aa sigi a sɔ́ berebe ébe éne, mot te éne a ne é mot aa du bot ya Mfúfúp Nsísim. ³⁴Éde me yén yaá ní, me vé yaá fe ngañiá ná mot te éne a ne É Mwán Nzamá.

Yesus aa tára tɔ́p beyága

³⁵É mos ó ngá belan véa, Juan a ngá bera tébe ó véa bábe beyága bé beañ béye béyága beñ. ³⁶Niané a ngá yén Yesus eé lot, éde a ngá dzó ná, “É mwann ntómá Nzamá éne ní.” ³⁷Éde niané beyága bé beañ béte bé ngá wók é dzam a ngá dzó, bé nga ke bá bee Yesus.

³⁸Vé niané Yesus á ngá veɔ́n, á yén bó béé bee ní, ané a ngá síli bó ná, “Dzé mína dzéɔ́?”

Éde bé ngá yalan ya ní ná, “Á Rabí (bá kelan do ná, ‘Á nyágale’), o tɔ́ ó vé?”

³⁹Ané a ngá dzó bó ná, “Nzaán, mína ye yén”. Éde bé ngá ke yén é vóm a mbé a tɔ́; ané bé ngá lígi bábe bó mos te; ákoan á ntɔ́ ané méwola mé nii ye ngɔ́gáse.

⁴⁰A mbé Andrés, Simón Pedro mwanɔ́n, mot mbóó ye é bot bé beañ bé ngá wók Juan, bé nga bee Yesus. ⁴¹Éní te aá tára koan ya mwanɔ́n Simón, éde a ngá dzó ní ná, “Bí koan yaá ya Mesías (bá kelan do ná, ‘Kristo’).”

⁴²Ané a ngá ke ya ní ébe Yesus. Niané Yesus a ngá dága ní, véa á dzó ní ná, “Wa o ne Simón, é mwán Jonás; bá ye wa lwée ná Sefas (bá kelan do ná ‘Pedro’).”

⁴³É mos ó ngá belan véa, Yesus eé kómo ke á Galilea, ané a ngá koan ya Felipe, véa aa dzó ní ná, “Beegé ma.” ⁴⁴Felipe te a mbé mot ye á Betsaida, é kísoan Andrés bá Pedro.

⁴⁵Éde Felipe ní aa koan ya Natanael, ané a ngá dzó ní ná, “Bí yén yaá é mot Moisés a ngá tsili á nkɔ́ métsiŋj été, ya fe bekúlu medzó, Yesus é mwán José, mot ye á Nasaret.”

⁴⁶Ané Natanael a ngá síli ní ná, “Ye é dzam é ne mvéáñ é ne só á Nasaret?”

Éde Felipe a ngá yalan ya ní ná, “Nzá áyén.”

⁴⁷Niané Yesus a ngá yén Natanael eé nzu ní bebeñ, éde a ngá dzó á mfá weñ ná, “Dággán, ñá mwann Israelita éñe ní, meduk mé sés ébe éñe.”

⁴⁸Ané Natanael a ngá síli ní ná, “Wa yem ma ó vé?”

Véa éñe Yesus a ngá yalan ya ní ná, “Me yén wa éyɔŋ wa tɔ́ élé Ígera ásí kaa ná Felipe á lwée wa.”

⁴⁹Ané Natanael a ngá yalan ya ní ná, “Á Rabí, wa o ne É Mwán Nzamá! Wa fe o ne Kéza ye Ísrael.”

⁵⁰Éde Yesus a ngá kɔ́ɔ ya ní eé síli ní ná, “Ye wa bwíni akála me dzó wa ná me yén wa éyɔŋ wa tɔ́ élé Ígera ásí? Wa ye yén é mam má danj émá!” ⁵¹Ané Yesus a ngá dzó ní ná, “Bébélá ya bébélá ma dzó wa ná, mína ye yén dzóp é yɔ́, é baáŋgel Nzamá béé bét ya ásigi ébe é Mwán Mot.”

É fét alúkgán á Kaná

2 ¹Éde é mos léa, fét alúkgán é ngá ɔ́ɔban á Kaná ye á Galilea, ñiá Yesus a mbé ó weñ. ²Bá bána fe Yesus á fét alúkgán te bábe béyága beñ.

³Éde éyɔŋ a ngá ɔ́ ná vino á ŋga dzéj yaá, ané ñiá Yesus a ngá dzó ní ná, “Béé belé fe vino.” ⁴Éde Yesus a ngá yalan ya ní ná, “Á miningá, é ne bía wa dzé? Áwola dam dáá bé kwíñ.”

⁵Ané ñiá a ngá dzó bevwála bíséññ ná, “Bɔ́gán édí áse aa ye mína dzó.”

⁶Milígá mekwá mí saman mí mbé ó véa, ámvála é fúlú bejudio bá fúbu ñúu e mbé. Kada nlígá ó ngá baga tánj bebeñ ané ntet belitro. ⁷Ané Yesus a ngá dzó ɔ́ ná, “Dzálágán milígá ya mendzím.” Ané bé ngá mana myɔ́ ádzalá abóm. ⁸Éde Yesus a ngá dzó ɔ́ ná, “Byetgán áwola dí, míní ke ákee nwulu ya fét.” Ané bé ngá ɔ́ do. ⁹Éyɔŋ nwulu ya fét ní a kyak yaá méndzím mé ngá veŋan vino, ní kaa áyem é vóm bé ngá só ya wɔ́, (ve bevwála bíséññ, ébá bé ngá láp mendzím, ébó bé ngá yem do), éde nwulu ya fét te a ngá lwée é mot a ngá lúkgan, ¹⁰á dzó ní ná, “Mot áse aa tára téle é vino a ne mvéáñ, éyɔŋ bot bé fían yaá, véa éñe bá téle éñe a ne kaa ádanj ya mvéáñ; ve wa o nii é vino a ne mvéáñ anzukwíñ áwola dí.”

¹¹Yesus a ngá bɔ átáraga mendem te á Kaná ye á Galilea, eé lére é dúmá deñ; ané béyága beñ bá bé ngá bwíni fe ní. ¹²Atéé ye ó véa, éde a ngá sigi á Kapernaúm, bá ñiá, ya bobéñan, ya fe béyága beñ; ve béé ndzí tɔbɔ ó wéñ abwiññ melú.

Yesus aa fúbu Templo

Jn 2.14-16; Mt 21.12-13; Mr 11.15-17; Lk 19.45-46

¹³Ákoan ná é Fét Paskua bejudio e ntɔ́ bebeñ, éde Yesus a ngá bét á Yerusalen, ¹⁴ané a ngá koan á templo été ya é bot bá kuan beñát, ya mitómá, ya abeñɛ, ya fe betsén moann bé tɔ́ ósí. ¹⁵Éde niané a ngá bɔ nkás ya mikɔ́, á ñga kúlu bésesé á templo été, átára mitómá ya beñát; á ñga wea fe é moann betsén moann ósí, ya áśɔ́gle betéble.

¹⁶Ané a ngá dzó é bot bé ngá kuan abeñɛ ná, “Veagán é byém bí ó vá; é ndá Tará míní taa dɔ bɔ ndá okira.”

¹⁷Éde béyága beñ bé ngá síman ná é ne ntsilann ná, “Abéánn ébe é ndá dzwe dá ye ma yónj á nlém été.”

¹⁸Ané betébosú béye bejudio bé ngá kóɔɔ ya ní, béé síli ní ná, “Nzá ndem wa lére bía ná wa bɔ é mam má?”

¹⁹Éde Yesus a ngá yalan bó ná, “Tsamɣánán é templo ní, ma ma ye dɔ bera téle nia melú mé léa.”

²⁰Akála te édɔ bejudio bé ngá dzó ná, “É templo ní baá lónj dɔ tánj mibú mewóm mé nii ya mibú mí saman, ye ná wa wa ye dɔ téle tánj melú mé léa?”

²¹Ve, ní a ngá kóɔɔ ébe é templo ye é ñúu deñ. ²²Édɔ ná, éyɔɛ a ngá wómo míwúán été, éde béyága beñ bé ngá síman ná aá dzó dzam te; ané bé ngá bwíni Mitsili, ya fe éfíá Yesus a ngá kóɔɔ.

Yesus aa yem milém mí bot

²³Ve, é tám a mbé á Yerusalen ó Fét Paskua, abwiññ bot é ngá bwíni éyola deñ béé yén méndem meñ, é má a ngá bɔ. ²⁴Éde Yesus émyen, ní éé ngá tɔbɔ ki ya bó mebúnn, amú ná a ngá yem bésesé, ²⁵éé ngá yi ki ná mot enziɣ á vé mot ngañiá, amú ná a ngá yem édí é ne mot été.

Yesus bá Nikodemo

3 ¹Mot enziɣ ye befariseo a mbé, a tɔ́ éyola ná Nikodemo, ntébosú á bejudio été. ²Mot te a ngá nzu ébe éñe á alú, ané a ngá dzó ní ná, “Á Rabí, bía yem ná waá sɔ́ ébe Nzamá ané nyágale, amú ná mot enziɣ a sés bɔ méndem wa bɔ má ngé Nzamá a sés ya ní.”

³Éde Yesus a ngá yalan ya ní ná, “Bébélá ya bébélá ma dzó wa ná, é mot a bɔ kaa bera ábyálá a sés yén édzwée ngómán Nzamá.”

⁴Ané Nikodemo a ngá síli ní ná:

É mot a ntɔ́ nnomm a ne byála á yá? Ye ná a ne níí éyɔɛ beañ ábum ñiá ná á byála?” ⁵Éde Yesus a ngá yalan ya ní ná, “Bébélá ya bébélá

ma dzó wa ná, ngé mot áá byála á mendzím, ya fe á Nsísim a sés ñíí édzwée ngómán Nzamá. ⁶É dzóm é ne mbyálann ye á ñúu mison, é ne ñúu mison. Édí dá é ne mbyálann ye á Nsísim, é ne nsísim. ⁷O táa yágán ná me dzó yaá wa ná, ‘Mína yian bera ábyálá.’ ⁸Evúnj dá ke é vóm dá kómo, wa wa wók fe éduŋ deñ; ve wáá yem é vóm dá só ngé ki é vóm dá ke. Éñe é mot áse a ne mbyálann á Nsísim éñe a ne néa. ⁹Ané Nikodemo ñí a ngá síli ñí ná, “Mam méte mé ne bɔban á yá?” ¹⁰Éde Yesus a ngá yalan ya ñí ná,

Wa o ne nyágale Ísrael été. Ye ná wáá yem é mam má? ¹¹Bébélá ya bébélá ma dzó wa ná, é dzam bía yem édo bía kóbo, édí dá bía yén, édo fe bía vé ngañiá; ve mína mínáá ñɔŋ é ngañiá wea. ¹²Ngé me kóbo yaá ya mína mam méye é sí ñí, mína kaa ábwíni, éñe mína ye bwíni á yá ngé ma kóbo ya mína mam méye á dzóp?

¹³Mot enziŋ áá bé bet á dzóp été, fáve éñí a ngá sigi á dzóp, é Mwán Mot [éñí a tɔɔ á dzóp]. ¹⁴Éde, amvála ané Moisés a ngá bére ñó óyóp éyáŋj été, éñe fe dá yian néa, ná é Mwán Mot ñí bé bére fe óyóp, ¹⁵á mfá ye ná é mot áse aa bwíni ñí [á bɔ kaa dzímle, fáve ná], á belé éniŋ é ne mbéámbéa.

É mora edziŋ Nzamá

¹⁶Amú ná ámvála Nzamá a ngá dziŋ bot béye é sí ñí, néa éñe a ngá vé é Mwán mbɔɔ ya mbɔɔ weñ, á mfá ye ná éñí áse aa bwíni ñí á bɔ kaa dzímle, ve fáve ná, á belé éniŋ é ne mbéámbéa. ¹⁷Akála ná Nzamá eé ndzí lóm é Mwán weñ é sí ñí, ná á nzu kí k é sí ñí misaŋ, ve fáve ná é sí ñí eé tɔbo nkoránn amú éñe. ¹⁸É mot aa bwíni ñí báá kí k ñí misaŋ; ve éñí áá bwíni bé kí k yaá ñí misaŋ, amú ná eé ndzí bwíni éyola é Mwán mbɔɔ ya mbɔɔ Nzamá.

¹⁹Nkíkán misaŋ éwo wí: ná eyéá daá só é sí ñí, ve bot bá bé ngá lík eyéá, bé ŋga dziŋ dzíbi; amú ná míbɔann myeba mí mbé abé. ²⁰Akála ná éñí áse aa bɔ édí é ne abé, aa víni eyéá, áá nzu ki éyéá été, á mfá ye ná míbɔann myeñ mí nza ñí bwaale. ²¹Ve éñí aa yébe bébélá aa nzu éyéá été, á mfá ye ná míbɔann myeñ mí léreban ná aa bɔ myɔ á Nzamá été.

Juan aa vé Yesus ngañiá

²²Véa éñe Yesus a ngá sian bábe báyaga beñ ábeŋj sí ye á Judea, éde a ngá tɔbo bábe bó ó véa á ŋga du bot.

²³Juan ñí a ngá du fe bot Énon beben á Salim, amú ná abwiññ mendzím é mbé ó véa; ané bot bé ngá só, béé duuban. ²⁴(Ákoan ná báá bé fet Juan á mbok).

²⁵Dzam te édo, mikéá mí ngá kwíñ ébe báyaga Juan ya mwann Judio, á mfá édí ye á ntunán ñúu. ²⁶Éde bé ngá ke ébe Juan, bé dzó ñí ná, “Á

Rabí, é mot mína ní míní mbé á Yordán áyát, éní o ngá vé ngañiá, dágge ná mot te á nga du yaá, bot bése bá bá ke fe ébe éñe.”

²⁷Ané Juan a ngá yalan ná, “Mot enziḡ a sés ñḡḡ dzam enziḡ, fáve ngé éñe bé vé ní ḡḡ á dzóp été. ²⁸Mína bébyen mína vé ma ngañiá ná me ngá dzó ná, “Se ma me ne Kristo, ve fáve ná me mbé nlómánn ósú weñ.

²⁹Éñí a belé mbóm, éñe a ne é mot aa lúkgan. Ve é mvwíññ é mot aa lúkgan te, bá ní bá bé téle, eé béá ní, ní á nga sán fe ya abwiññ mesán akála é kíḡḡ é mot aa lúkgan te. Néa éñe mésán mam, má mé dzálában yaá fe. ³⁰Da yian ná mot te éñe aa vémm, ve ma mé nga síbi.”

Nzamá a kee yaá Mwán mam mése

³¹Éñí aa só ó yóp, éñe a ne bése sé áyóp; éñí a ne éñí ye é sí ní, a ne éñí ye é sí ní, aa kóbo fe mam méye é sí ní. Éñí aa só á dzóp été, a ne bése sé áyóp. ³²É dzam éñí te a yén yaá, ya fe áwók, édo aa vé ngañiá; ve mot enziḡ ní áá ñḡḡ é ngañiá weñ. ³³É mot a ñḡḡ yaá é ngañiá weñ, a vé yaá sitám ná, Nzamá a ne bébélá. ³⁴Amú ná éñí Nzamá á ngá lóm aa kóbo é mam Nzamá, akála ná éñe fe aa vé Nsísim kaa miyeñ.

³⁵Éséá aa dziḡ Mwán, a kee yaá fe ní mam mése é mó meñ. ³⁶Éñí aa bwíni Mwán a belé éniḡ é ne mbéámbéá; ve éñí ní áá bo Mwán mewók, áá ye yén eniḡ, fáve ná méyéá Nzamá má tóbo ébe éñe.

Yesus bá miningá ye á Samaria

4 ¹Édo ná, éyḡḡ Ntí a yem yaá ná befariseo bé ngá wók bot béé dzó ná, “Yesus aa wún ya fe ná aa du abwiññ beyága álot Juan.”

²(Afáḡḡ ná se Yesus émyen éñe a ngá du bot, fáve beyága beñ). ³Éde a ngá kólo á Judea, á bera ke á Galilea. ⁴Dá é ngá yian fe ya ní ná á lot á Samaria. ⁵Ya dzam te é ngá sian ya ḡḡ é kísoan ye á Samaria é mbé eyola ná Sikár, bebeñ áfóo sí Jakob a ngá vé é mwán weñ José. ⁶Ó véa éñe étam Jakob é mbé. Éde Yesus ní a tóḡ mvwaránn amú nkíkḡán okaḡḡ, dzam te édo a ngá tóbo ósí étam á mféḡḡ. A mbé ané amyeré.

⁷Véa, miningá ye á Samaria a ngá nzu láp mendzím, ané Yesus a ngá dzó ní ná, “Vá ma ná me ñú.” ⁸Ákoan beyága beñ bá bé ke yaá á kísoan ná bá ke kus bidzí.

⁹Édo miningá ye a Samaria a ngá yalan ya ní ná, “É ne bo á yá ná wa dzó ma ná me vé wa ná o ñú, o tóḡ mwann Judio, ma me ne miningá ye á Samaria?” (Amú ná Bejudio báá sanjan mam bábe Besamaritano).

¹⁰Ané Yesus a ngá yalan ya ní ná, “Ngé o yem é dás Nzamá ya fe nzá aa dzó wa ná, ‘Vá ma ná me ñú, ngé wa o dzaa yaá ní, ngé ní a vé yaá fe wa betétéá méndzím.”

¹¹Éde miningá te a ngá dzó ní ná, “Á Ntí, weé belé nloḡḡ enziḡ, etam dá é ne fe edwá. Éñe vóm mbé o belé betétéá méndzím? ¹²Ye ná o ne

mora mot álot tará Jakob, éñí a ngá vé bía étam dzí, édo émyen, ya bwán, ya fe bíyém m byeñ bé ngá ñú?”

¹³Ané Yesus a ngá yalan ya ñí ná, “Éñí áse aa ñú mendzím m má, aa ye bera wók evée. ¹⁴Ve éñí áse ñí aa ye ñú méndzím m ma ye ñí vé, áá ye bera wók evée tám enziñ; fáve ná méndzím m ma ye ñí vé, má ye ñí súgan áfóm méndzím m dá dzólo á mfá éniñ é ne mbéám béa.”

¹⁵Éde miningá te a ngá dzó ñí ná, “Á Ntí, vá ma mendzím m méte, á mfá ye ná me bó kaa ábera wók evée, ngé ki ánzú ó vá ná ma nzu láp méndzím m.”

¹⁶Ané Yesus a ngá dzó ñí ná, “Kéñ lwée ñu nnóm, o só fe ó vá.”

¹⁷Éde miningá te a ngá yalan ya ñí ná, “Mée belé nnóm.”

Ané Yesus a ngá dzó ñí ná, “O yem yaá kóbo ná, ‘Mée belé nnóm,’ ¹⁸amú ná o belé yaá beyóm bé tán, ve éndagá éñí o belé ñí a sés ki ñu nnóm, é dzam o kóbo dí é ne bébélá.”

¹⁹Véa miningá te a ngá dzó ñí ná, “Á Ntí, me téa ná o ne nkúlu medzó. ²⁰Éñe bétará bé ngá kañ nkoó wí, ve mína mína dzó ná Yerusalen, ó weñ éñe a ne é vóm bá yian kañ.”

²¹Éde Yesus a ngá dzó ñí ná:

Á miningá, belégé mbwínánn ébe ma, ná tám dá nzu eyoñ mínáa ye kañ Tará á nkoó wí ngé ki á Yerusalen. ²²Mína kañ éñí míní ne kaa áyem; ve bía bía kañ éñí bía yem, amú ná akoroga dá só ébe Bejudio. ²³Ve tám dá nzu, é ntó fe éndagá, éyoñ beñá bekañ bá ye kañ Tará á nsísim ya bébélá; amú ná, amvála bot te édo Tará aa dzéñ ná bé kañ ñí. ²⁴Nzamá a ne Nsísim; édo ná, é bot bé kañ ñí bá yian ñí kañ á nsísim ya á bébélá été.

²⁵Véa miningá te a ngá dzó ñí ná, “Ma yem ná Mesías aa nzu, éñí bá lwée ná Kristo, éde eyoñ aa ye só, aa ye bía kat mam mése.”

²⁶Ané Yesus aa dzó ñí ná, “Ma ñí, éñí aa kóbo ya wa.”

²⁷Tám te édo béyága beñ bé ngá sian, bé nga yágán fe ná aa kóbo bá miningá te; afáñbo néa, ve mbóó enziñ eé ndzí ñí síli ná, “Dzé wa dzéñ?” Ngé ki ná, “Amú dzé ki wa kóbo mína ñí?”

²⁸Édo ná miningá te a ngá lík é nloñ weñ, a kéñ á kísoan, á nga dzó bot ná, ²⁹“Nzaán áyén mot enziñ ye a mana yaá ma kóbo é mam mése me bo yaá. Ye ná se éñe a ne Kristo?” ³⁰Ané bé ngá kólo á kísoan béé ke ébe éñe.

³¹Tám te, béyága beñ bá béé dzaa ñí ná, “Á Rabí, dzá!”

³²Ve ñí a ngá dzó bó ná, “Me belé bídzí ma dzí, ébí míní ne kaa áyem.”

³³Dzam te édo beyága bé ngá kóbo bébyen ya bébyen ná, “Ye mot enziñ á só ñí vé é dzóm aa dzí?”

³⁴Éde Yesus a ngá dzó bó ná:

Bídzí byam bí ne ná me bo nkómánn éñí a ngá lóm ma, ya fe ná me dzalá éséñ deñ. ³⁵Nde mína dzó ná, ‘A ngén aa dzéñ ngwan é

nii, nia véa, é tám bá ñɔŋ bidzí é kwíñ?’ Ve dágǵán ma ma dzó mína ná, béregán é mís menan ó yóp ná míní yén ané bidzí bí ntɔ́ bitótólo méfúp á mfá ye ná bé ñɔŋ byɔ?

³⁶É mot aa yoo bidzí aa ñɔŋ é máán meñ, ákóán fe bibumá á mfá éniŋ é ne mbéámbeá, ná é mot aa beñ á sán bá é mot aa yoo nsámá mbɔ́. ³⁷Amú amvála te édo éfíá dí é ne bébélá ná, ‘Ngúrá mot éwo wá beñ, éní mbɔ́ ñí aa yoo.’ ³⁸Ma me lóm yaá mína ná míní ke yoo édí míní ndzí bo eséññ; bot befé ébó bé ngá bo eséññ, ve mína, míní ñí yaá eséññ deba été.

³⁹Éde ébe kísoan te, abwiññ bot ye á Samaria é ngá bwíni ñí ákála éfíá miningá te, ébe é ngañiá a ngá vé ná, “Mot te á mana ma kɔ́bo é mam mése me bo yaá.” ⁴⁰Édo ná niané bwann Besamaritano bé ngá ke koan ya ñí, bé nga dzaa ñí ná á lígi bábe bó. Éde a ngá lígi ó véa táŋ melú mé beañ. ⁴¹Ané abwiññ bot afé é ngá bwíni ákála éfíá deñ. ⁴²Éde bé ngá dzó miningá ná, “Bíá bwíni fe éndagá amú é dzam o mvá bía kat; bía bébyen bí wók yaá, bí yem yaá fe ya bébélá ná, é mot ñí éne a ne Nkoro bot béye é sí ñí [Kristo].”

Yesus aa señ é mwán mbo biséññ ye á ngómán

⁴³Niané melú mé beañ mé ngá lot, éde a ngá kólo ó véa ná aa ke á Galilea. ⁴⁴Yesus émyen a ngá vé ngañiá ná nkúlu medzó enziŋ báá vé ñí ngaŋŋ é dzeá deñ émyen. ⁴⁵Édo ná, éyɔŋ a ngá sian a Galilea, bot béye á Galilea bé ngá ñɔŋ ñí, akála ná baá yén é mam mése a ngá bó á Yerusalen ó fét; amú bá baá ke fe ó fét te.

⁴⁶Véa éne a ngá bera nzu á Kaná ye á Galilea, é vóm a ngá veŋan mendzímme vino. Éde mbo biséññ enziŋ ye á ngómán a mbé ó véa a belé mwán nkúkwann á Kapernaúm. ⁴⁷Niané mot te, a ngá wók ná Yesus a ntɔ́ á Galilea eé sɔ́ á Judea. Ané a ngá ke koan ya ñí eé dzaa ñí ná á sigi á mfá aa ke señ é mwán weñ, ákoan ná a nkún wú.

⁴⁸Éde Yesus a ngá dzó ñí ná, “Ngé mínáá yén mendem ya biyágán bí mam, mínáá ye bwíni.”

⁴⁹Ané mot te a ngá dzaa ñí ná, “Á Ntí siggé ntéññ mwán áá bé ma wú.”

⁵⁰Véa éne Yesus a ngá dzó ñí ná, “Kéŋ, mwán a ne wa ntéteá.” Ané mot te a ngá bwíni éfíá Yesus a ngá kɔ́bo ñí, éde a ngá ke.

⁵¹Éde é tám a ngá sigi, ané áloá deñ é ngá ke toban ya ñí, béé dzó ñí ná, “Mwán a ne wa ntéteá.” ⁵²Dzam te édo a ngá síli bó ná, “Nzá áwola a ngá tara ná aa bo óngongó?” Ané bé ngá yalan ya ñí ná, “Ooŋgɔ́gɔ́, áwola avɔ́ ye ngɔ́gáse éne avép é ngá kígi ñí ó ñúu.”

⁵³Éde eséá a ngá yem ná áwola te ébyen édo Yesus a ngá dzó ñí ná, “Mwán a ne wa ntéteá.” Véa mot te ya é ndá bot deñ áse bé ngá bwíni.

⁵⁴Édí te édo é ne é ndem beañ Yesus a ngá bo, éyɔŋ a ngá sian á Galilea, eé sɔ́ á Judea.

Yesus aa señ nkúkwann fám

5 ¹Niané mam méte mé ngá lot, fét bejudio enziṅ e mbé, ané Yesus a ngá bét á Yerusalen. ²Á Yerusalen ó véa, etemṅa mendzímme é mbé édí mitómá, bé ngá lwée do á nkóbo Ebreo ná Betesda, e belé fe misenṅ mí tán mí tóó ya midzií.

³Abwiññ bot é mbé é bóo mevóm méte; mikúkwann, ya midzínzímme, ya mibóbók, ya fe ébá mesúk mé ñúu mé mbé mikát, [béé yana ná mendzímme mé fógan, ⁴amú ná ángel enziṅ a ngá bo eé sigi metám mé enziṅ étemṅa te, ná aa fógó mendzímme. Éde, é mot ósúá a ngá tára bo eé sigi etemṅa niané mendzímme má fógan, a ngá bo eé tóbo mvwaá ébe ámvála okwann óse a mbé a belé].

⁵Mot enziṅ a mbé ó véa, ákoan ná a tóbo yaá nkúkwann táṅ mibú mewóm mé léa ya mibú mmom. ⁶Éyṅṅ Yesus a yén yaá ñí a bóo ó véa, eé yem fe ná a tóbo yaá ó véa abwiññ tám, éde a ngá dzó ñí ná, “Ye wa kómo tóbo mvwaá?”

⁷Ané nkúkwann te ó ngá yalan ya ñí ná, “Á Ntí, mée belé é mot a ke ya ma étemṅa éyṅṅ mendzímme má fógan. Niané ma ke sian, ma koan ná mot mfé a sigi yaá ma ósú.”

⁸Éde Yesus a ngá dzó ñí ná, “Tébegé, twáagé é mwann enziṅ we, o wulu fe.”

⁹Etéññ te ébyen mot te a ngá tóbo mvwaá, ané a ngá twáa é mwann enziṅ weñ, á ṅga wulu. Á mbé fe é mos Satará.

¹⁰Ya dzam te édo betébosú béye bejudio bé ngá dzó é mot a ngá tóbo mvwaá ná, “É mos wí ó ne mos Satará, atsiṅṅ dáá yébe wa ná o бага é mwann enziṅ we.”

¹¹Ve mot te ñí a ngá yalan ya bó ná, “É mot a mvá ma señ éñe á dzó ma ná, ‘Twáagé é mwann enziṅ we, o wulu.’ ”

¹²Ané bé ngá síli ñí ná, “Nzá a ne é mot a mvá wa dzó ná, ‘Twáagé, o wulu fe?’ ” ¹³Ve, é mot a ngá señban, ñí éé ngá yem nzá a mbé été, amú ná Yesus aá mana dzámán á nkuna bot ó mbé ó véa été.

¹⁴Niané mam méte mé ngá lot, véa éñe Yesus a ngá koan ya ñí á templo, ané a ngá dzó ñí ná, “Béṅ yén ná o ntóó mvwaá; o táa bera bo nsémme, a nza bo ná é dzam dá daṅ ya abé é lot ya wa.” ¹⁵Ané mot te a ngá ke dzó betébosú béye bejudio ná, Yesus éñe a ne é mot a ngá tóó ñí mvwaá. ¹⁶Ya dzam te édo betébosú béye bejudio bé ngá dzéṅ Yesus ásí, [bé ṅga kómo ñí áywiñ], akála ná a ngá bo mam méte é mos Satará.

¹⁷Ve Yesus a ngá dzó bó ná, “Ya anzukwiñ áwola dí, Tará a ngén aa bo eséññ, ma ma bo fe eséññ.” ¹⁸Akála te édo, betébosú béye bejudio bé ngá bíra dzéṅ ná bé ywiñ ñí, amú ná se fáve ná a ngá tsam é mos Satará, ve ya fe ná a ngá dzó ná Nzamá éñe a ne Éséá weñ émyen, ná a ne ntéññ mbóó bá Nzamá.

É Mwán Mot a belé nguú á mfá ákík misaṅ

¹⁹Éde Yesus a ngá yalan ya bó ná:

Bébélá ya bébélá ma dzó mína ná, Mwán a sés bɔ dzam enziṅ ébe émyen, fáve édí aa yén Éséá eé bɔ. Amú ná é dzam áse Éséá a bɔ, édo fe Mwán ní aa bɔ amvála avɔ́ɔ ya avɔ́ɔ. ²⁰Amú ná Éséá aa dziṅ Mwán, éde fe aa lére ní é dzam áse Émyen aa bɔ; aa ye fe ní lére míbɔann myá daṅ ya minén álot émí, á mfá ye ná míní yágán.

²¹Akála te édo, ámvála Éséá aa wómo miwúán, eé vé myɔ eniṅ, amvála te fe Mwán ní aa vé é bot aa kómo eniṅ.

²²Amú ná Éséá ní áá kík fe mot enziṅ nsaṅ, fáve ná nkíkán misaṅ óse, a kee yaá wɔ Mwán, ²³á mfá ye ná mot áse a vé Mwán ngaṅṅ, ámvála aa vé fe Éséá ngaṅṅ. É mot a ne kaa ávé Mwán ngaṅṅ, áá vé ki Éséá ngaṅṅ, éní a ngá lóm ní. ²⁴Bébélá ya bébélá ma dzó mína ná, é mot aa béá éfiá dam, eé bwíni fe éní a ngá lóm má, mot te a belé éniṅ é ne mbéámbéá. Éní te áá ye ñɔṅ nkíkán misaṅ, fáve ná a kólo yaá áwú été, ve a níi yaá éniṅ été.

²⁵Bébélá ya bébélá ma dzó mína ná, tám dá nzu, é ntɔ́ɔ fe, éyɔṅ miwúán myá ye wók é kíṅṅ é Mwán Nzamá, véa ébá bá wók do, bá ye tɔbɔ ya eniṅ. ²⁶Amú ná, ámvála Éséá émyen a belé eniṅ, néa fe a vé yaá Mwán ná émyen a belé eniṅ ébe émyen. ²⁷Éde a ngá vé ní nguú edzwée á mfá nkíkán misaṅ, amú ná éñe a ne é Mwán Mot.

²⁸Míní táa yágán dzam te, amú ná tám dá nzu, éní é bot bése bé ne mésoṅ ó sí, bá ye wók é kíṅṅ deñ, ²⁹véa ébá bé ngá bɔ édí é ne mvéáñ bá ye kwíñ átán á mfá nwómán miwúán ye éniṅ. Ve ébá bá bé ngá bó mbéa bé mam, bá ye wómo á mfá nkíkán misaṅ.

³⁰Éde mámyen me sés bɔ dzam enziṅ; ámvála ma wók, néa éñe ma kík nsaṅ. Nkíkán misaṅ wɔm, wá ó ne fe nzósoó, amú ná máá dzéṅ nkómán wɔm, fáve nkómán éní a ngá lóm ma.

Bébélá ngañiá á mfá Yesus

³¹Ngé ma vé ngañiá á mfá wɔm mámyen, é ngañiá wɔm a sés bébélá.

³²Ve mot mfé éñe aa vé ngañiá á mfá wɔm, ma ma yem fe ná é ngañiá aa vé á mfá wɔm a ne bébélá. ³³Mínaá lóm bot ébe Juan, ní a vé yaá fe ngañiá á mfá bébélá. ³⁴Ve ma máá ñɔṅ é ngañiá mwann mot; fáve ná ma kóbo mam méte á mfá ye ná míní tɔbɔ nkoránn. ³⁵Éñe a mbé é láma a ngá yóṅ ya á feañ, mína míní tɔp fe ná mína sán ya éyéá deñ oyomm tám enziṅ.

³⁶Ve me belé é ngañiá aa lot éní Juan, akála ná míbɔann Tará a ngá vé ma ná me dzálá myɔ, mibɔann míte émyɔ fe myá vé ma ngañiá ná Tará aá lóm ma.

³⁷É Tará a ngá lóm ma, ní a vé yaá fe ngañiá á mfá wɔm. Mína mínáá bé wók é kíṅṅ deñ tám enziṅ, mínáá bé ki ní yén ámvála a

ne. ³⁸Míníí belé éfíá deñ, dá dáá tɔɔ ki ébe mína, amú ná éñí a ngá lóm, éñí te éñe mínáá bwíni.

³⁹Mína fas Mitsili amú mína tém ná éñe míní belé éniɲ é ne mbéámbeá été; émyɔ fe myá myá vé ngañiá á mfá wɔm; ⁴⁰éde mína mínáá kómo nzu ébe ma, ná míní belé éniɲ.

⁴¹Máá ñɔɲ dúmá ébe bot; ⁴²ve me yem yaá mína, ná édziɲɲ Nzamá míníí belé dɔ ébe mína. ⁴³Me sɔ yaá ébe éyola Tará, mína kaa ma áñɔɲ; ve ngé mot enziɲ mfé aa sɔ ébe éyola deñ émyen, éñí te éñe mína ye ñɔɲ. ⁴⁴Eñe mína ye bwíni á yá, míníí ñɔɲ dúmá bevɔɔ ya ébá bevɔɔ, mína kaa ádzéɲ é dúmá dá sɔ ébe é Nzamá etámm a ne mbɔɔ ya mbɔɔ?

⁴⁵Mína táa tém ná ma ma ye mína sómán ébe ású Tará; mot mbɔɔ a ne ná éñe aa sómán mína, é Moisés míní mana yaá tɔɔ ya ñí mebúnn. ⁴⁶Amú ná, ngé á bɔ ná mínaá bwíni Moisés, ngé mína bwíni fe ma; amú ná éñí te éñe aá tsili á mfá wɔm. ⁴⁷Ve, ngé mínáá bwíni mítsili myeñ; éñe míní ne bwíni bífíá byam á yá?

Yesus aa vé bot binzuk bí tán bidzi

6 ¹Niané mam te mé ngá lot, ané Yesus a ngá ke á máɲ méye Galilea áyát, é má Tiberias. ²Éde bora nkuna bot ó ngá bee ñí, amú ná bé ngá yén méndem a ngá bɔ ébe mikúkwann. ³Ané Yesus a ngá bét á nkoó ó yóp a kéñ tɔɔ ósí ó véa bábe béyága beñ, ⁴ákoan ná Paskua, é fét bejudio é ntɔɔ bebeñ.

⁵Niané Yesus a ngá bére mís a yén ná bora nkuna bot wá nzu ébe éñe, éde a ngá dzó Felipe ná, “Vóm mbé bí ne kus mifémm, á mfá ye ná ngé é bot bá bé ne dzí?” ⁶Ve Yesus ñí a ngá dzó dɔ, eé kyak ñí, amú ná a ngá yem é dzam a mbé ná a nkún nzu bɔ.

⁷Ané Felipe a ngá yalan ya ñí ná, “Mifémm táɲ bedenario mitet mí beañ myá myáá ye ki yian ná kada mot a ne ñɔɲ avítsaɲ.”

⁸Éde Nyága mbɔɔ ye béyága beñ, Andrés, Simón Pedro mwanñaɲ, a ngá dzó Yesus ná, ⁹“Omómɔɲɲ ó ne vá, ó belé mifémm mí sebada mí tán ya kwaás é beañ; ve dá é ne ki dzé ábímm bot dí?”

¹⁰Ané Yesus a ngá dzó ná, “Bɔgán bot ná bé tɔɔ ósí,” obut wá ó mbé fe abwiññ ó véa. Éde befám bebeñ ané binzuk bí tán, bé ngá mana tɔɔ ósí. ¹¹Véa éñe Yesus a ngá twáa mifémm, éde niané a ngá mana vé akíba, á nga kap myɔ é bot bé mbé bé tɔɔ ósí. Néa fe a ngá bɔ ya kwaás ébe ábímm bé ngá kómo.

¹²Niané bé ngá dzéñ, éde a ngá dzó béyága beñ ná, “Keɲán mína twáa bífús bí mvá buk, á mfá ye ná dzóm enziɲ é nza wú ntuk.” ¹³Ané bé ngá mana byɔ kóán ébe mifémm mí sebada mí tán bot bé ngá dzí, bé dzálá awóm mikpéñ ya mikpéñ mí beañ ya mebukga.

¹⁴Niané bot bé ngá yén é ndem a ngá bɔban, bé nga dzó ná, “Bébélá é mot ñí éñe a ne nkúlu medzó a mbé ná aa nzu éniɲ dzí.” ¹⁵Édɔ ná, Yesus

eé yem ná bé nkún ñí nzu ñɔŋ ya nguú ná bá téle ñí kéza, ané a ngá bera búlán á nkoó émyen etámm.

Yesus aa wulu méndzím̄m áyóp

¹⁶Niané ŋɔɔɔ e ngá kwíñ, ané béyága beñ bé ngá sigi ó mán. ¹⁷Éde bé ngá mana dan á byéa été, bé ŋga kígán mán á mfá á Kapernaúm. Ákoan ná dzíbi é tɔɔ, véa Yesus ñí áá bé ki nzu koan ya bó, ¹⁸dá é tɔɔ ná mán má mé ngá tára fe ná má ñan ákála bora evúŋ.

¹⁹Niané a ngá bɔ ná bé dúk yaá tán ané mekwá mé tán ngé ki mé saman, ané bé ngá yén Yesus eé wulu á mán áyóp eé nzu bebeñ é vóm byéa ó mbé, eyɔŋ te bá bé ŋga kɔ wɔŋŋ. ²⁰Ve ñí a ngá dzó bó ná, “A ne ma; míní taa kɔ wɔŋŋ.” ²¹Véa bá bé ŋga kómo ñí ñɔŋ á byéa, etéññ te ébyen éñe byéa ó ngá ke sian ó sí é vóm bé ngá ke.

Yesus émyen éñe a ne mfém̄m ye éniŋ

²²É mos ó ngá belan véa, nkuna bot ó mbé ó téle á mán áyát, ané ó ngá yén ná byéa ofé wéé mbé ó véa, fáve ovóɔ, ya fe ná Yesus eé ndzi dan á byéa été bábe beyága beñ, ve fáve ná béyága beñ bé ngá ke etámm. ²³Dá é tɔɔ fe ná mébyéa mefé mé mbé ó véa ná me ngá sɔ́ á Tiberias, bebeñ é vóm bé ngá dzí mifém̄m Ntí a ngá mana vé akíba ya myɔ. ²⁴Éyɔŋ nkuna bot te ó yén yaá ná Yesus a sés fe ó véa ngé ki béyága beñ, ané bé ngá dan mébyéa été, bé kéñ á Kapernaúm béé ke bá dzéŋ Yesus. ²⁵Éde niané bé ngá koan ya ñí á mán áyát, ané bé ngá síli ñí ná, “Á Rabí, o sɔ́ ó vá ódén?”

²⁶Éde Yesus ñí a ngá yalan ya bó ná, “Bébélá ya bébélá ma dzó mína ná, mína dzéŋ ma, se amú ná mínaá yén mendem, ve fáve amú ye ná mínaá dzí mifém̄m míní dzéñ fe. ²⁷Bɔgán eséññ se akála bídzi bíye byá wú ntuk, ve fáve ákála bídzi byá tɔbɔ akekwiñ éniŋ é ne mbéámbeá, ébí é Mwán Mot aa ye mína vé, amú ná éñe Tará Nzamá a bem yaá é sitám dzeñ.”

²⁸Ané bá bé ngá síli ñí ná, “Bía yian bɔ dzé á mfá ye ná bí bɔ bíséññ Nzamá?”

²⁹Éde Yesus a ngá yalan ya bó ná, “Éséññ Nzamá édo dí, ná míní bwíni éñí émyen á lóm yaá.”

³⁰Véa éñe, bé ngá síli ñí ná, “Nzá ndem wa lére á mfá ye ná ngé bí ne yén, ya fe ná ngé bí ne wa bwíni? Nzá dzam fá wa bɔ? ³¹Betará bé ngá dzí manná éyáŋŋ été, ámvála é ne ntsilann ná, ‘A ngá vé bó ná bé dzí mfém̄m ye á dzóp.’”

³²Dzam te édo Yesus ñí á ngá dzó bó ná, “Bébélá ya bébélá ma dzó mína ná, se Moisés éñe aá vé mína mfém̄m ye á dzóp, ve Tará, éñe aa vé mína ná mfaŋ mfém̄m ye á dzóp. ³³Amú ná, mfém̄m Nzamá éwɔ ó ne éñí a ngá sigi á dzóp été ná aa vé bot béye é sí ñí eniŋ.”

34 Éde bé ngá dzó ñí ná, “Á Ntí, vá bía mfémm te eyɔŋ ése.”

35 Ané Yesus a ngá dzó bó ná,

Ma me ne mfémm ye éniŋ, éñí a nzu ébe ma áá ye wók nzeñ eyɔŋ enziŋ. Éñí ñí aa bwíni fe ma, ñí áá ye ki bera wók evéé eyɔŋ enziŋ. 36 Ve ma me mvá mína dzó ná míní yén yaá ma, véa mína kaa ábwíni. 37 Éñí áse Tará aa vé ma, aa ye nzu ébe ma; éñí ñí aa nzu fe ébe ma, ma máá ye ki tsílán ya ñí amvála enziŋ.

38 Dá é tɔɔ ná ma me sigi yaá á dzóp, se á mfá ye ná me bo nkómánn wɔm, ve fáve nkómánn Éñí a ngá lóm ma. 39 Édo ná nkómánn Éñí a ngá lóm ma éwɔ wí ná, me táa dzímle mbóó enziŋ ye ébá bésesé a vé yaá ma, ve fáve ná ma ye ñí wómo é mos wá súgan.

40 Amú ná nkómánn Tará éwɔ wí ná, é mot áse aa yén Mwán, a bwíni fe ñí, a ne belé eniŋ é ne mbéámbéá, mámyen ma ma ye fe ñí wómo é mos wá súgan.

41 Dzam te édo bejudio bé ngá tára ná bá kóbo ya ñí miswa, amú aá dzó ná, “Ma me ne mfémm ó ngá sigi á dzóp.” 42 Ané bé ngá síli bevóó ya ébá bevóó ná, “Ye ná se Yesus, é mwán José éñe ñí, éñí bía yem fe éséá bá ñíá? A ne dzó áwola dí á yá ná, ‘Me sigi yaá á dzóp?’ ”

43 Éde Yesus a ngá yalan ya bó ná,

Míní táa kóbo miswa bevóó ya ébá bevóó. 44 Mot enziŋ a sés nzu ébe ma, ngé se é Tará a ngá lóm ma, éñe aa dulu ñí, ma me wómo fe ñí é mos wá súgan. 45 É ne ntsilann mébá bekúlu medzó ná, “Bésese bá ye ñɔŋ ayágalé ébe Nzamá.” Ya fe ná éñí áse a wók yaá, a ñɔŋ yaá fe ayágalé aa nzu ébe ma.

46 Se ná mot enziŋ a yén yaá Éséá; fáve éñe a ne éñí Nzamá, éñí te éñe a yén yaá Éséá. 47 Bébélá ya bébélá ma dzó mína ná, éñí aa bwíni, a belé eniŋ é ne mbéámbéá.

48 Ma me ne mfémm ye éniŋ! 49 Beésúá bé ngá dzí manná éyáŋŋ été, véa bé wú fe. 50 Mfémm wí éwɔ wá sigi á dzóp été, ná éñí áse aa dzí wó á bo kaa áwú. 51 Ma me ne ntetéá mfémm, éwí ó sigi yaá á dzóp été. Ngé mot enziŋ aa dzí mfémm te aa ye niŋ kómm áse; mfémm ma ye vé á mfá ávé bot béye é sí ñí eniŋ, ó ne é ñúu dam. 52 Éde bejudio bé ngá bo mikéá bébyen ya bébyen, béé dzó ná, “Éñí a ne bía vé é ñúu deñ ná bí dzí do á yá?”

53 Ané Yesus ñí a ngá yalan ya bó ná,

Bébélá ya Bébélá ma dzó mína ná, ngé mínáá dzí é ñúu é Mwán Mot, ya fe áñú mékií meñ, míníí belé eniŋ ébe mína bébyen. 54 Éñí aa dzí é ñúu dam ya fe áñú mékií mam, a belé eniŋ é ne mbéámbéá, ma ma ye fe ñí wómo é mos wá súgan. 55 Amú ná é ñúu dam é ne ñá mfaŋ bidzí, mékií mam fe má mé ne ñá mfaŋ meñú. 56 Éñí aa dzí é ñúu dam ya fe áñú mékií mam, aa laŋan a tɔɔ ébe ma, ma fe ntéññ mbóó ébe éñe.

⁵⁷Ámvála é Tará a ne ntétéá a ngá lóm ma, ma ma niŋ fe ákála Tará, éñí ñí aa dzí fe ébe ma, éñí te ñí aa ye fe niŋ ákála ma.

⁵⁸Mfém m wí éwó ó sigi yaá á dzóp été; se ané éwí beésúá bé ngá dzí, véa bé weñ; ve éñí ñí aa dzí mfém m wí aa ye niŋ kómm áse.

⁵⁹Yesus a ngá dzó mam méte á sinagoga enziŋ été, eé vé ayágalé á Kapernaúm.

Mfúfúp Nsísim éñe aa vé eniŋ

⁶⁰Dzam te édo, abwiññ béyága béye áabeñ, béé wók do, ané bé ngá dzó ná, “Áyágalé dí é ne ayéñ; nzá a ne do yébe?”

⁶¹Ve Yesus, ñí eé yem á nlém weñ été ná béyága beñ bá ke bá kóbo do biswaáswaá á mfá dzam te, éde á ngá dzó bó ná, “Ye dzam te dá bo ná míní kɔp obaá? ⁶²Éde á yá, ngé é bo ná mína yén é Mwán Mot eé bét é vóm a ngá tára tɔbo? ⁶³Nsísim éñe aa vé eniŋ; ñúu é mot dáá vé abúánn enziŋ; bífiá me kóbo yaá mína bí ne nsísim, bí ne fe eniŋ. ⁶⁴Ve, bot benziŋ béye ébe mína báá bwíni.” Amú ná Yesus a ngá bem tára yem benzá béye ébe bó bé mbé kaa ábwíni, ya fe éñí a mbé ná aa ye ñí kuan.

⁶⁵Éde a ngá dzó ná, “Akála te édo, me dzó yaá mína ná, mot enziŋ a sés nzu ébe ma ngé báá bé ñí do vé ébe Tará ná a bo do.”

⁶⁶Atéé ye eyɔŋ te, abwiññ beyága béye áabeñ bé ngá lík ná bá bee ñí, ébó kaa fe áwulu bábe bó nsámá. ⁶⁷Éde Yesus a ngá síli beyága awóm ya beyága bé beañ ná, “Ye mína mína kómo fe ke?” ⁶⁸Ané Simón Pedro a ngá yalan ya ñí ná, “Á Ntí, bía ye ke ébe nzá. Wa o belé bífiá bíye éniŋ é ne mbéámbeá; ⁶⁹bía bí bwíni yaá, bí yem yaá fe ná wa o ne Mfúfúp Mot Nzamá [Kristo, é mwán é Nzamá á ne ntétéá].”

⁷⁰Éde Yesus a ngá yalan ya bó ná, “Nde se ma maá tɔp mína awóm ya bé beañ? Ve mot mbóó ye ébe mína a ne déble.” ⁷¹A ngá dzó ya Judas Iskariote, é mwán Simón; amú ná éñí te éñe a mbé mot mbóó ye awóm ya bé beañ ná a nkún ñí nzu kuan.

Yesus bóbéñan bá lére éndendaŋ ná báá bwíni ñí

7 ¹Véa, Yesus a ngá ke aa wulu á Galilea, éñe kaa fe ákómo áke á Judea amú ná betébosú béye bejudio bé ngá dzéŋ ná bá ywíñ ñí. ²Ákoan fét bejudio é ntɔó bebeñ, éñí bitɔbɔga. ³Éde, bóbéñan bé ngá dzó ñí ná, “Kólogé ó vá, o ke á Judea á mfá ye ná béyága bwe bá bé yén fe míbɔann wa bo; ⁴amú ná mot enziŋ áá bo dzam áswéññ éyɔŋ aa kómo ná bé yem ñí á bot été. Ngé wa bo é mam má, kéŋ álére wámyen á bot béye é sí ñí été.” ⁵(Amú ná atwaa bóbéñan bá béé ngá bwíni ki ñí.)

⁶Ané Yesus á ngá dzó bó ná, “É tám dam dáá bé kwíñ, ve é tám denan édo é ne eyɔŋ ése. ⁷Bot béye é sí ñí bé sés mína vini, ve bá vini ma, akála ná ma vé é ngañiá á mfá weba ná míbɔann myeba mí ne abé. ⁸Bétgán ó fét; ma máá ke ó fét te, amú ná é tám dam dáá bé dzálában.” ⁹Niané a ngá mana dzó dzam te, a ngá lígi á Galilea.

Yesus aa ke ó fét bitɔbɔga

¹⁰Ve niané bɔbɛ̃naŋ bé ngá bét ó fét, éde ñí a ngá ke fe; afáŋbɔ se éyéá été, ve fáve ané ásweññ.

¹¹Dzam te édo betébosú béye bejudio bé ngá dzéŋ ñí ya do ó fét, béé dzó ná, “Mot te a ne ó vé?” ¹²Abwiññ miswa é ngá bɔban á bot été; mingúrá mí bot mií dzó ná, “A ne mbamba mot,” ébá bevóó bá ná, “Kaa, fáve ná aa duk bot.” ¹³Afáŋbɔ néa, mot enziŋ éé ngá kóbo á mfá weñ á bot été, amú ná bé ngá ko betébosú béye bejudio wɔŋŋ.

¹⁴Ve, énzénzaŋ fét ébyen, éñe Yesus a ngá bét a kéñ ñíí á templo á ŋga yágale bot. ¹⁵Ya dzam te édo betébosú béye bejudio bé ngá ku ya do mevoó, béé dzó ná, “É mot ñí a ne belé nyemann á yá, éñe kaa áñɔŋ méyágalé?”

¹⁶Éde Yesus ñí a ngá yalan ya bó ná,

Ayágalé dam é sés áandam, é ne édí éñí a ngá lóm ma. ¹⁷Ngé mot enziŋ aa kómo bo nkómánn Nzamá, aa ye yem ngé ayágalé dam dá só ébe Nzamá, ngé ki ná ma kóbo ya é nguú dzam mámyen. ¹⁸Éñí aa kóbo á mfá weñ émyen, aa dzéŋ é dúmá deñ émyen; ve éñe ñí aa dzéŋ e dúmá éñí a ngá lóm ñí, mot te éñe a ne bébélá mot, ekúkwať dá é sés ki ébe éñe. ¹⁹Nde se Moisés éñe aá vé mína nkóó métsiŋŋ? Afáŋbɔ ná mot enziŋ ye ébe mína ñí áá dzálá wɔ! Ve, akála dzé mína dzéŋ ná míní ywiñ ma?

²⁰Ané nkuna bot ó ngá yalan ná, “O belé mbéa nsísim. Nzá aa dzéŋ ná aa ywiñ wa?”

²¹Éde Yesus a ngá yalan ya bó ná,

Mbɔann dzam avóó me bo, édo mína bésesé mína míní mana yaá ku mevoó. ²²Ya dzam te édo Moisés a ngá vé mína nkíkǵán mekeé (se ná ó mbé éwí Moisés, ve fáve ná, ó mbé éwí bimvámvmám byeñ); édo ná é mos Satará wá mína kík fe fám akeé. ²³Ngé fám da ñɔŋ nkíkǵán akeé é mos Satará á mfá ye ná bé bo kaa tsam nkóó métsiŋŋ Moisés, akála dzé mína wók abé ya ma, ngé ma me mana séñ mot é mos Satará? ²⁴Kaa kíkǵán nsaŋ ya édí bá yén, ve kíkǵánán nsaŋ ó ne nzósoó.

²⁵Ané bot benziŋ béye á Yerusalen bé ngá dzó ná, “Nde se é mot bá kómo ywiñ éñe ñí? ²⁶Yénǵánán, aa kóbo á bot été, bá kaa ñí ádzó dzam enziŋ. Ye a ne bo tám enziŋ ná betébosú bé yem yaá bébélá ná Kristo éñe ñí? ²⁷Ve bía, bía yem é vóm mot ñí aa só; ve éyɔŋ Kristo aa ye só, mot áá ye yem é vóm aa só.”

²⁸Éde Yesus eé yágale á templo été, a ngá yónán ya kíŋŋ oyaáp óyóp, eé dzó ná, “Mína yem ma, mína yem fe é vóm ma só; ma meé ndzí ki só ya é nguú dzam mámyen. Ve éñí a ngá lóm ma a ne bébélá, éñí míní ne kaa yem. ²⁹Ma yem ñí, amú ná éñe maá só ébe éñe, ané fe éñí á ngá lóm ma.”

³⁰Ya dzam te édo, bé ngá dzéŋ ya do ná bé biñ ñí; ve mot enziŋ eé ndzi ñí kee mó ó ñúu, amú ná ákoan é tám deñ dää bé kwíñ. ³¹Ve, abwiññ bot béye á nkuna bot été é ngá bwíni ñí, bé ŋga dzó ná, “Éyŋ Kristo aa ye só, ye aa ye bera bo méndem má lot é má é mot ñí a bo yaá?”

Benzima bá ke biñ Yesus

³²Niané befariseo bé ngá wók nkuna bot wá ke wá kóbo mam méte á bísawaáswaá été á mfá weñ, éde betébosú befára ya befariseo bé ngá lóm mewasíli ná bé ke ñí biñ. ³³Éde Yesus a ngá dzó bó ná, “Me ngén bíabe mína táŋ oyomm tám; nia véa me búlán ébe éñí a ngá lóm ma. ³⁴Mína ye ma dzéŋ, ve mínáá ye koan ya ma; míní sés ki kwíñ é vóm me tó.”

³⁵Ané betébosú béye bejudio bé ngá ke bá dzó bébyen ya bébyen ná, “Vóm mbé é mot ñí aa nkún ke, ya fe ná bí sés koan ya ñí? Ye ná a nkún nzu ke é sí begriego bé ne myeann, á mfá áyágale begriego? ³⁶Édí a dzó yaá dí dá yíli á yá, ná, ‘Mína ye ma dzéŋ, mínáá ye koan ya ma; ya fe ná míní sés ki kwíñ é vóm me tó?’”

³⁷É mos ó ngá súgan, é bora mos onén ye ó fét, Yesus a téle tételé, éde a ngá bére kíŋŋ ó yóp, eé dzó ná, “Ngé mot enziŋ a belé evéé, á nzá ébe ma, á ñá fe. ³⁸É mot aa bwíni ma, ané Ntsili wá dzó ‘Á nlem weñ été aswíñ mendzímme ye éniŋ dá ye fwíigan.’ ” ³⁹(Ve, a ngá dzó dzam te ébe á Nsísim ye ébá bé ngá bwíni ñí bé mbé ná bé nkún ñŋ; ákoan Nsísim áá bé sian, ya ná Yesus ñí áá bé ki tóbo á dúmá deñ été.) ⁴⁰Éde, bot benziŋ béye á nkuna bot, niané bé ngá wók bífíá bíte, bé ŋga dzó ná, “Bébélá ya bébélá ná éñí éñe a ne nkúlu medzó.” ⁴¹Ébá bevóó bá ná, “É mot ñí a ne Kristo.” Ve, befé bá bé ngá dzó ná, “Ye é ne Kristo aa ye só á Galilea? ⁴²Nde Ntsili wáá dzó ná Kristo aa ye só é mvŋŋ bot David, á Belén, é dzea David a mbé a tó?” ⁴³Ané nkánán ó ngá ñíí á nkuna bot été ákála deñ. ⁴⁴Éde bevóó bé ngá kómo ñí biñ, ve mot enziŋ eé ndzi ñí kee mó ó ñúu.

Betébosú bá lére éndendaŋ ná báá bwíni Yesus

⁴⁵Niané mewasíli mé ngá búlán ébe betébosú befára ya befariseo, éde bé ngá síli bó ná, “Amú dzé míníí ndzi só ya ñí?”

⁴⁶Ané mewasíli mé ngá yalan ná, “Mot enziŋ mfé áá bé tára kóbo ané mot te.”

⁴⁷Véa éñe befariseo bé ngá síli bó ná, “Ye mína bé duk yaá fe? ⁴⁸Ye mot enziŋ ye betébosú, ngé ki mot enziŋ ye befariseo a bwíni yaá ñí? ⁴⁹Ve nkuna bot wá ó ne kaa áyem nkóó métsiŋŋ wí, ó ne ya biboŋ.”

⁵⁰Éde Nikodemo, a tóó mot mbóó ye ébe bó, éñí a ngá tára ke ébe Yesus, a ngá síli bó ná, ⁵¹“Ye nkóó métsiŋŋ wea wá kík mot nsaŋ ngé kaa ná bé tára ñí byéa, véa bé yem é dzam á bo?”

⁵²Ané bé ngá yalan ya ñí ná, “Ye wa o ne fe mot ye á Galilea? Fasge, o yén ná nkúlu medzó enziŋ áá bé só á Galilea.”

⁵³Éde kada mot a ngá ke é ndá dzeñ.

Bá dzili miningá á medzián été

8 ¹Ve Yesus ní a ngá ke nkoó Álíba. ²Niané kírí e ngá léne, éde a ngá bera só á templo, ané nnam ngúrá ó ngá ke ébe éñe; ní á nga vé fe bɔ ayágale, a tɔ́ ósí.

³Ané beyágale métsiɲɲ ya befariseo bé ngá só ya miningá ná bá dzili ní á medzián été, éde bé ngá nzu ní téle á bot été. ⁴Ané bé ngá dzó ní ná, “Á Nyágale, é miningá ní bé dzili ní á medzián mébyen été. ⁵Éde á nkoó métsiɲɲ été, Moisés aá mánan bía ná, ámvála biningá te bí lúm dɔ mekwá. Ve wa wa dzó á yá?”

⁶Bá bé ngá dzó dzam te ná bá kyak ní, á mfá ye ná bé belé nzá ámvála bé ne ní sómán. Ve Yesus ní a ngá lúnbe ósí, á nga tsili ó sí ya onuu.

⁷Éde akála ná bé ngá tsíni béé síli ní, ané a ngá tébe tételé a dzó bɔ ná, “Éní a ne kaa nsémm ébe mína, á bɔ́ɔge é mot ósúá aa wea ní akwá.”

⁸Ané a ngá bera lúnbe ósí, á nga tsili ó sí. ⁹Véa éñe ébɔ, niané bé ngá wók dɔ, bé nga kólo mbɔ́ɔ ya mbɔ́ɔ, átée ye beñá bot, ané a ngá lígi etámm ya é miningá a mbé a téle énzézanɲ.

¹⁰Niané Yesus á ngá tébe tételé, éde a ngá dzó miningá ná, “Á miningá, bé nɔ́ɔ vé? Ye ná mbɔ́ɔ enziɲ áá vé wa meku?”

¹¹Ané a ngá yalan ná, “Á Ntí, kaa mbɔ́ɔ.”

Ané Yesus a ngá dzó ní ná, “Ma máá vé ki wa meku. Kéɲ, átée ye áwola dí o táa bera bɔ nsémm.”

Yesus éñe a ne eyéá ye éniɲ

¹²Ané Yesus a ngá bera kɔ́bɔ ya bɔ eyɔɲ efé, eé dzó ná, “Ma me ne éyéá bot béye é sí ní; éní aa bee ma, áá ye wulu ó dzíbi ósí, fáve ná aa ye belé eyéá ye éniɲ.”

¹³Éde véa befariseo bé ngá dzó ní ná, “Wa wa vé wámyen ngañiá; é ngañiá we a sés bébélá.”

¹⁴Ané Yesus ní a ngá yalan ya bɔ ná,

Atwaa ngé ma vé mámyen ngañiá, é ngañiá wɔm a ne bébélá, amú ná ma yem é vóm maá só, ya é vóm ma ke; ve mína, mínáá yem é vóm maá só, ngé ki é vóm ma ke. ¹⁵Mína mína kík nsan amvála ané mot binam, ma máá kík mot enziɲ nsan. ¹⁶Ve ngé ma kík ki nsan; nsan wɔm ó ne bébélá; amú me sés fáve mámyen etámm, ve ná ma ya é Tará a ngá lóm ma. ¹⁷É ne ntsilann á nkoó métsiɲɲ wenan été ná, é ngañiá bot bé beañ a ne bébélá. ¹⁸Ma me ne éní aa vé é ngañiá wɔm mámyen, é Tará aá lóm ma, ní aa vé fe é ngañiá wɔm.

¹⁹Ané bé ngá síli ní ná, “Ésúá a ne ó vé?”

Éde Yesus a ngá yalan ná, “Mínáá yem ma, mínáá yem ki Tará. Ngé míni yem ma, ngé mína yem fe é Tará wɔm.”

²⁰A ngá kóbo mam méte éyɔŋ a ngá yágale bot á templo, é vóm bé ngá bo béé nii bivévé; mot enziŋ kaa ñí ábiñ, amú ná ákoan áwola deñ dáá bé kwíñ.

Yesus aa dzó ná aa ye ke

²¹Ané a ngá bera bó dzó ná, “Ma ke, mína ye ma dzéŋ, ve mína ye wú mísémm myenan été; é vóm ma ke, míní sés ki kwíñ ó weñ.”

²²Éde betébosú béye bejudio bé ngá dzó ná, “Ye aa ye ywíñ émyen eé dzó ná ‘é vóm ma ke míní sés ki kwíñ ó weñ?’ ”

²³Éde Yesus a ngá dzó bó ná, “Míní ne bot béye así, ma me ne mot ye óyóp, míní ne bot béye é sí ñí, ma me sés mot ye é sí ñí. ²⁴Dzam te édo me mvá mína dzó ya do ná, mína ye wú mísémm myenan été; amú ná ngé mína kaa ábwíni ná ma me ne, mína ye wú mísémm myenan été.”

²⁵Ané bé ngá síli ñí ná, “O ne nzá?”

Éde Yesus ñí a ngá yalan ya bó ná, “Édí me dzó yaá mína atéé ye átáraga? ²⁶Me belé abwiññ mam ye ákóbo ya ákík nsaŋ ébe mína; ve éñí a lóm yaá ma a ne bébélá; édo ná, é mam mé wók yaá ébe éñe, mam méte émo ma kóbo bot béye é sí ñí.”

²⁷Ve béé ndzí yem ná aa kóbo ya bó á mfá Éséá.

²⁸Dzam te édo Yesus a ngá dzó ya do ná, “Éyɔŋ mína ye bére é Mwán Mot óyóp, véa éñe mína ye yem ná ma me ne, ya fe ná máá bo dzam enziŋ ya é nguu dzam mámyen, fáve ná ámvála Tará a vé yaá ma ayágale, mam méte émo ma kóbo. ²⁹Éñe ñí a lóm yaá fe ma, a ne bía ñí; ñí áá lík ki ma etámm, amú ná ma bo eyɔŋ ése édí dá vé ñí nlém mesán.”

³⁰Éde eé kóbo mam méte, abwiññ bot é ngá bwíni ñí.

Bébélá éñe aa ye mína tɔɔ filí

³¹Ané Yesus a ngá dzó béjudio bé ngá bwíni ñí ná, “Ngé míní tɔbo mbán ayágale dam été, mína ye bo béñá béyága bam; ³²éde mína ye yem bébélá, bébélá fe ñí aa ye mína tɔɔ filí.”

³³Ané bé ngá yalan ya ñí ná, “É mvɔŋ Abraam édo bí ne, bíá bé ki tɔbo áloá mot enziŋ. Nzá amvála wa dzó ná, ‘Mína ye tɔbo filí?’ ”

³⁴Éde Yesus ñí a ngá yalan ya bo ná,

Bébélá ya bébélá ma dzó mína ná, éñí áse aa bo nsémm a ne oloá ye á nsémm. ³⁵Oloá wá wáá tɔbo ki eyɔŋ ése á ndá; ve fáve mwán éñe aa tɔbo eyɔŋ ése. ³⁶Édo ná, ngé Mwán a tɔó mína filí, mína ye tɔbo ná filí. ³⁷Ma yem ná é mvɔŋ Abraam édo míní ne, ve mína, mína dzéŋ ná míní ywíñ ma, amú ná éfiá dam déé belé afóo ébe mína.

³⁸É mam me yén yaá ébe Tará; émo ma kóbo, ané mína mína bo fe é mam míní wók yaá ébe ésúá wenan.

Déble éñe a ne bó éséá

³⁹Éde bá bé ngá yalan ya ñí ná, “É tará wea éñe a ne Abraam.”

Ané Yesus a ngá dzó bó ná, “Ngé é bwán Abraam ébó míní bɔ, ngé míbɔann Abraam émyɔ mína bɔ. ⁴⁰Ve éndagá mína mína dzéj ná míní ywíñ ma, é mot me kóbo yaá mína é bébélá me wók yaá ébe Nzamá. Édí te Abraam ñí eé ndzí dɔ bɔ. ⁴¹Mína bɔ míbɔann ésúá wenan.” Éde bé ngá dzó ñí ná, “Bíí ndzí byála bíbwán été; bí belé éséá mbɔɔ, Nzamá.”

⁴²Ané Yesus a ngá dzó bó ná,

Ngé Nzamá éñe á bɔ Ésúá wenan, ngé mína dziŋ ma, amú ná é ma ñí éñe maá sɔ ébe Nzamá, akála ná meé ndzí sɔ ya é nguu dzam mámyen, ve fáve ná éñe aá lóm ma. ⁴³Amú dzé mínáá wók nkóbo wɔm? Akála ná míní sés wók bífiá byam. ⁴⁴Míní ne é bwán ésúá wenan débɛ, míkómánn ésúá wenan émyɔ fe mína kómo dzálá. A ne nywíññ bot atée ye átáraga, eé ndzí tɔbo mbán á bébélá été, amú ná bébélá a sés ébe éñe. Éyɔŋ aa kóbo mineá, aa kóbo é dzam deñ émyen, amú ná a ne nnéneá ya fe éséá mineá.

⁴⁵Ve ma, akála ná ma kóbo bébélá, mínáá bwíni ma. ⁴⁶Nzá ye ébe mína aa bwaale ma nsémm? Ngé ma kóbo bébélá, amú dzé mínáá bwíni ma? ⁴⁷Éñí a ne é mot Nzamá, aa wók bífiá Nzamá; dzam te édo mínáá wók ya dɔ, amú ná míní sés ébá Nzamá.

Yesus aa kóbo ébe á mfá Abraam

⁴⁸Ané betébosú béye bejudio bé ngá yalan ya ñí ná, “Nde bíá dzó bébélá ná o ne mwann Samaritano ya fe ná o belé mbéa nsísim?”

⁴⁹Éde Yesus a ngá yalan ná, “Měé belé mbéa nsísim, fáve ná ma séme é Tará wɔm, ve mína mína lére ma osoán. ⁵⁰Ve ma máá dzéj é dúmá dam, éñí aa dzéj dɔ a ne; aa kík fe misaŋ. ⁵¹Ma dzó mína bébélá ya bébélá ná, ngé mot a dzálá bífiá byam, áá ye wú mbéámbéá.”

⁵²Éde betébosú béye bejudio bé ngá dzó ñí ná, “Áwola dí édo bí túga yaá yem ná o belé mbéa nsísim. Abraam ya bekúlu medzó baá wú, éde wa wa dzó ná, ‘Ngé mot a baale bífiá byam áá ye kyak awú mbéámbéá.’ ⁵³Ye o ne bora mot ádaŋ tará wea Abraam éñí aá wú? Bekúlu medzó bá bá wú fe. Wa bɔ wámyen nzá?”

⁵⁴Éde Yesus a ngá yalan ná, “Ngé ma vé mámyen dúmá, é dúmá dam é ne nzeze; Tará éñe a ne éñí aa ye ma vé dúmá; éñí mína dzó ná, ‘a ne é Nzamá wea.’ ⁵⁵Mína mínáá yem ñí; ve ma ma yem ñí. Véa ngé ma dzó ná máá yem ñí ma ye bɔ nnéneá ané mína. Ve fáve ná ma ma yem ñí, ma baale fe éfiá deñ. ⁵⁶Ésúá wenan Abraam, a ngá sán eé yana ná áyén é mos wɔm; aá yén wó, á ŋga sán fe.”

⁵⁷Dzam te édo betébosú béye bejudio bé ngá dzó ya ñí dɔ ná, “Wáá bé ki belé mibú mewóm mé tán! Ye ná o yén yaá Abraam?”

⁵⁸Éde Yesus a ngá dzó bó ná, “Ma dzó mína bébélá ya bébélá ná, kaa ná Abraam á byála, ma me ne.”

⁵⁹Ané bé ngá twáa mekwá ná bá lúm ñí mɔ; ve Yesus ñí a ngá sɔbo, a kwíñ á templo átán. [Ané a ngá kólo bó été, a kéñ].

Yesus aa señ mot a ngá byála ndzimm

9 ¹Yesus eé lot, éde a ngá yén mot enziŋ a tɔɔ ndzimm atée ye ábyálá. ²Ané béyága beñ bé ngá síli ní ná, “Á Rabí, ná éñí á byála ndzimm, nzá aá bɔ nsémm, ye é mot ní émyen ye beéséá?”

³Éde Yesus ní a ngá yalan ná, “É mot ní émyen eé ndzí bɔ nsémm, ngé ki beéséá, ve fáve ná míbɔann Nzamá mí léreban ébe éñe. ⁴Bía yian bɔ míbɔann éñí a lóm yaá ma ntéññ omos ó ngén; alú dá nzu éyɔŋ mot enziŋ a sés bɔ eséññ.

⁵Éyɔŋ me ngén me tɔɔ é sí ní, me ne éyéá bot béye é sí ní.”

⁶Niané a ngá kɔbɔ dzam te, á nga túp menden ó sí, eé bɔ ntɔp, éde a ngá wáa ndzindzimm ntɔp te ó mís meñ. ⁷Ané a ngá dzó ní ná, “Kéŋ, o sop mís étemŋa méndzimm Siloé” (édí bá kelan ná, “Nlómánn”). Éde a ngá ke, a mana sop mís, a búlán fe eé yén.

⁸Ané, é bot bé mbé bé tɔɔ bábe bó, ya fe ébá bé ngá tára bɔ béé yén ané aa dzaa byém, bé ngá dzó ná, “Nde se éñí éñe a ngá bɔ eé ke aa tɔbɔ ósí, eé dzaa bot byém?” ⁹Bevɔɔ benziŋ bé ngá dzó ná, “Éñe ní.” Ébá bevɔɔ bá ná, “Kaa, fáve ná aa fonan ya ní.” Ve émyen ní a ngá dzó ná, “Ma ní.”

¹⁰Éde bé ngá síli ní ná, “Á kúu wa mís á yá?”

¹¹Ané a ngá yalan ná, “É mot bá lwée ná Yesus éñe á mana bɔ ntɔp, a wáa ma wɔ ó mís, á dzó ma ná ‘Keŋ á sop mís á Siloé.’ Éde mé ke, me sop mís, véa mé nga yén.”

¹²Ané bé ngá síli ní ná, “Mot te a ne ó vé?”

Éde a ngá yalan ná, “Máá yem.”

Befariseo bá síli mot te misílí

¹³Ané bé ngá ke ya é mot a mbé ndzimm ébe ású befariseo. ¹⁴(Ve é mos Yesus a ngá mana bɔ ntɔp a kúu fe ní mís ó mbé é mos Sátará.) ¹⁵Éde befariseo bá bé ngá bera ní síli amvála avé a ngá tára ná aa yén. Ané a ngá dzó bó ná, “Á wáa ma ntɔp ó mís, éde me ke sop mís, véa mé nga yén.”

¹⁶Ya dzam te édɔ befariseo benziŋ bé ngá dzó ná, “É mot ní áá sɔ ébe Nzamá, amú ná áá baale é mos Sátará.”

Ve ébá bevɔɔ bá ná, “Mbɔ misémm a ne bɔ ámvála mendem te á yá?” Éde bé ngá kánan énzézaŋ. ¹⁷Ané bé ngá bera síli ndzindzimm ná, “Wa wa dzó nzá dzam á mfá weñ, dá é tɔɔ ná éñe á kúu wa mís?”

Ané a ngá dzó ná, “A ne nkúlu medzó.”

¹⁸Ve, betébosú béye bejudio bá béé ngá yébe ná a mbé ndzimm, ná véa á nga yén, fáve ye akekwiñ ané bé ngá lwée é mot a ngá bera yén beéséá. ¹⁹Éde bé ngá síli bó ná, “Ye é mwán wenan ní, éñe mína dzó ná aá byála ndzimm? É ne bɔ á yá ná á nga yén yaá éndagá?”

²⁰Ané beéséá bá bé ngá yalan ná, “Bía yem ná é mwán wea éñe ní, ya fe ná aá byála ndzimm; ²¹ve, bíá yem nzá ámvála aa yén éndagá; bíá yem

ki é mot á kúu ñí mís. Á ntóó ñá mot. Síligán ñí; émyen aa ye kóbo á mfá weñ.”

22 (Beéséá bá bé ngá dzó mam méte akála ná bé ngá kɔ betébosú béye bejudio wɔŋŋ; amú ákoan betébosú béye bejudio bé mana yaá ábán ná, ngé mot enziŋ a mem ná éñe a ne Kristo, bá ye tsílán ya ñí á Sinagoga. 23 Dzam te édo beéséá bé ngá dzó ya do ná, “Síligán émyen; a ntóó ñá mot.”)

24 Éde bé ngá lwée é mot a mbé ndzímme éyɔŋ beañ, béé dzó ñí ná, “Vá Nzamá dúmá; bía yem ná mot te a ne mbo misémm.”

25 Ané ñí a ngá yalan ná, “Ngé a ne mbo misémm, mãá yem; dzam avóó édo ma yem, fáve ná, me mbé ndzímme, ve éndagá mé nga yén yaá.”

26 Éde bé ngá síli ñí ná, “Á bo wa nzá dzam? Á kúu wa mís á yá?”

27 Ané a ngá yalan ná, “Me tára yaá mína do ádzó, ve mína kaa ma béá. Amú dzé mína kómo do bera wók? Ye mína mína kómo fe bo béyága beñ?”

28 Véa bé nga tea ñí, béé dzó fe ñí ná, “Wa o ne nyága weñ, ve bía bí ne béyága Moisés. 29 Bía yem ná Nzamá a ngá bo eé kóbo ya Moisés, ve éñí, bía yem é vóm aa só.”

30 Éde mot te ñí a ngá yalan ya bó ná, “Dzam te édo dá é ne eyágán dzam, ná mínáá yem é vóm aa só, ve ñí a kúu yaá ma mís. 31 Bía yem ná Nzamá áá wók bebo misémm, ve ngé mot enziŋ aa kɔ Nzamá wɔŋŋ eé dzálá fe nkómánn weñ, mot te éñe Nzamá aa wók. 32 Avé eniŋ é ngá tára, báá bé wók ná ndzíndzímme atéé ábyálá ná mot á kúu wo mís. 33 Ngé é mot ñí á bo kaa só ébe Nzamá, ngé á sés bo dzam enziŋ.”

34 Éde bé ngá yalan ya ñí ná, “Waá byála mbo misémm, ye ná wa ó nga nzu yaá bía vé ayágale?” Ané bé ngá tsílán ya ñí átán.

35 Niané Yesus a ngá wók ná bé tsílán yaá ñí, éde a ngá koan ya ñí aa síli ñí ná, “Ye wa bwíni é Mwán Mot?”

36 Éde a ngá yalan ná, “Á ndzwée, a ne nzá, á mfá ye ná me bwíni ñí?”

37 Ané Yesus a ngá dzó ñí ná, “O yén yaá ñí; é mot aa kóbo ya wa, éñe ñí.”

38 Éde a ngá dzó ná, “Á Ntí, ma bwíni.” Ané a ngá kútbe ó sí ná aa kaŋ ñí.

39 Éde Yesus á ngá dzó ná, “Maá só ébe bot béye é sí ñí á mfá nkíkán misaŋ, ná ébá bé ne kaa yén, bé yén; ébá bá bá yén, bá bé tɔbo ndzímme.”

40 Niané befariseo benziŋ béye bé mbé bábe bó bé ngá wók dzam te, ané bé ngá síli ñí ná, “Ye ná bía bí ne fe midzíndzímme?”

41 Éde Yesus á ngá yalan ya bó ná, “Ngé míní bo midzíndzímme, ngé míníí belé nsémm. Ve éndagá, amú mína dzó ná, ‘Bía yén’, nsémm wenan wá laŋan ó tɔó.”

Mitómá myá yem é kíŋŋ mbaale weba

10 1 Bébélá ya bébélá ma dzó mína ná, éñí aa bo kaa ñíí á mbéñ ábemá mitómá, ve fáve ná aa ke bét mfá mfé, mot te a ne

ndzídzip ya nzeé midzónɔ; ²ve éñe ñí aa ñíí á mbéñ, éñe a ne nkálá mitómá. ³Mot te éñe nkálá mbéñ ábemá aa kúu mbéñ, mitómá mí ɔga béa é kíɔɔ deñ, ñí á ɔga lwée fe mitómá ya eyola, véa a kéñ fe ya myɔ átán.

⁴Éyɔɔ a mana yaá ákwíñ átán ya mítómá myeñ, á ɔga ke myɔ ósú, mitómá myá mí ɔga bee fe ñí, amú ná myá yem é kíɔɔ deñ. ⁵Ve myáa ye bee eyágán mot, fáve ná myá ye ñí túp, akála ná myáa yem é kíɔɔ biyágán bí bot.

⁶Yesus a ngá vé bɔ nkaná wí; ve bá bée ndzí yem é mam a ngá kɔbɔ bɔ.

Yesus éñe a ne mbamba mbaale mitómá

⁷Éde Yesus a ngá bera bɔ dzó ná,

Bébélá ya bébélá ma dzó mína ná, ma me ne mbéñ mitómá. ⁸Ébá bése bé ngá tára ma sɔ ósú, bé ne midzídzip ya benzeé midzónɔ; ve mitómá myá míí ndzí bɔ béa. ⁹Ma me ne mbéñ; ngé mot a ñíí eé lot ébe ma, aa ye tɔbɔ nkoránn; véa aa ye bɔ eé ñíí, aa ye fe bɔ eé kwíñ, eé koan ya mevóm mé ne ya bilwá.

¹⁰“Ndzídzip wá sɔ fáve ná wá nzu dzíp, áywíñ, ya átsam; ma me sɔ yaá á mfá ye ná míní belé eniɔ, míní belé fe dɔ deé fwíige. ¹¹Ma me ne nkálá mitómá. Mbamba nkálá mitómá aa kee éniɔ dzeñ akála mitómá. ¹²Éñe ñí a ne nsán ngwan, a sés nkálá mitómá, a sésés kí myenn mitómá émyen niané aa yén ané ebyó dá nzu, aa lama mitómá a túp. Ebyó te dá é ɔga bíra biñ é ɔga bíra fe myɔ mana myean. ¹³Édɔ ná, éñe ñí aa sán ngwan áá bís édí mitómá.

¹⁴Ma me ne mbamba nkálá mitómá, ma yem áamyam, áamyam myá myá yem fe ma, ¹⁵amvála ané Tará aa yem ma, ma ma yem fe Tará, éde ma kee éniɔ dzam akála mitómá. ¹⁶Me belé fe mitómá mífé ná mí sés émí míye ábemá dí; émí míte myá ma yian fe nzu ya myɔ, myá mí béa fe é kíɔɔ dam; véa, mbamm wá ye bɔ mbɔɔ, nkálá mitómá ñí fe mbɔɔ.

¹⁷Dzam te édɔ Tará aa dziɔ ma ya dɔ, amú ná ma kee éniɔ dzam, ná véa ma bera fe dɔ ñɔɔ. ¹⁸Mot enziɔ áá vea ma dɔ, fáve ná mámyen ma kee dɔ. Me belé nguú edzwée ye ákee dɔ, me belé fe nguú edzwée á mfá ábera dɔ ñɔɔ. Mvéna te maá ñɔɔ dɔ ébe Tará.

¹⁹Éde nkánán ó ngá bera bɔban énzénzɔɔ bejudio akála bífíá bíte.

²⁰Ané abwiññ ye été é ngá dzó ná, “A belé mbémbéa nsísim, á ɔga kwan yaá fe á nlém. Akála dzé mína béa ñí?”

²¹Ébá bevɔɔ bá béé dzó ná, “Bífíá bí, bí sés ébí é mot a belé mbémbéa nsísim. Ye ná mbémbéa nsísim a ne kúu midzínzím mís?”

Bot bá tep Yesus

²²Éde é fét mesop templo e ngá sian á Yerusalen; a mbé metám mé mveɔ ya avép. ²³Véa Yesus eé ke aa wulu á templo, á nseɔ ndá Salomón. ²⁴Éde

betébosú béye bejudio bé ngá mana ní luŋ, béé síli ní ná, “Wa ye bía kele óyóp ye akekwiñ ó dén? Ngé wa o ne Kristo túga bía dɔ dzó éyéá été.”

²⁵Ané Yesus ní a ngá yalan ya bó ná,

Me dzó yaá mína dɔ, ve mína kaa bwíni; míbɔann ma bɔ ébe éyola Tará, émyɔ myá vé ma ngañiá. ²⁶Ve mína mínää bwíni, amú ná míní sés mítómá myám, [ámvála mé dzó yaá mína]. ²⁷Mítómá myám myá béá é kíŋɔ dzam, ma yem myɔ, myá myá bee fe ma. ²⁸Éde ma vé myɔ éniŋ é ne mbéámbéá, myää ye ki dzímle eyɔŋ enziŋ; mot enziŋ ní áá ye ki mí dut é mó mam. ²⁹É Tará a vé yaá ma myɔ, aa daŋ mot áse, mot enziŋ ní a sés ki myɔ dut é mó Tará été. ³⁰Bía Tará bí ne mot mbóó.

³¹Ané betébosú béye bejudio bé ngá bera twáa mekwá ná bá lúm ní.

³²Éde Yesus a ngá dzó bó ná, “Me lére mína abwiññ bembamba míbɔann míye ébe Tará. Óvé ye été mína lúm ma ya wɔ mekwá?”

³³Ané betébosú béye bejudio bé ngá yalan ya ní ná, “Bíá lúm wa mekwá ébe mbamba mbɔann enziŋ; ve fáve ákála nkóbo abyann; amú ná wa o tɔɔ mot, wa wa veŋan wámyen Nzamá.”

³⁴Éde Yesus ní a ngá yalan ya bó ná,

Nde é sés ntsilann á nkɔɔ métsiŋɔ wenan été ná, ‘Maá dzó ná, Míni ne benzamá?’ ³⁵Ngé aá lwée ébá éfiá Nzamá é ngá sɔ ya ébó ná, ‘benzamá’, (Ntsili wá kaa ki tɔbo ntsamann). ³⁶Ye ná éñí Tará a téle yaá eki, aa lóm fe ní éniŋ dzí, éñe mína dzó ná, nkóbo abyann, amú mé dzó ná, ‘Me ne é Mwán Nzamá?’ ³⁷Ngé máá bɔ míbɔann Tará, mínää bwíni ma. ³⁸Ve ngé ma bɔ myɔ, afáŋbɔ ná mínää bwíni ma, bwíniŋán míbɔann á mfá ye ná míní yem; míní yén fe ná Tará a ne ébe ma, ma me ne fe ébe Tará.

³⁹Véa éñe bé ngá bera dzéŋ ná bé biñ ní; éde ní a ngá kólo é mó meba été.

⁴⁰Ané a ngá bera ke á Yordán áyát, é vóm Juan a ngá tára du bot, éde a ngá lígi ó wéñ. ⁴¹Abwiññ bot é ngá nzu ébe éñe, deé dzó ná, Juan eé ndzí bɔ ndem enziŋ, ve é mam mése Juan a ngá dzó ébe é mot ní, mé mbé bébélá.” ⁴²Éde abwiññ bot é ngá bwíni ní ó wéñ.

Áwú Lásaro

11 ¹A ngá bɔ ná mot enziŋ a mbé nkúkwann, a tɔɔ eyola ná Lásaro, mot ye á Betania, é dzeá María bá mwanñaŋ Marta. ²(María éñe a ngá wáa Ntí mbwánn enum, a fími fe ní mebo ya ésií dzeñ. María te, ndóm Lásaro édɔ é mbé nkúkwann.) ³Éde bekéá bé ngá lóm Yesus mbáná ná, “Á Ntí, ndzindziŋɔ mot we, ó ne nkúkwann.”

⁴Niané Yesus a ngá wók dɔ, ané a ngá dzó ná, “Okwann te ó sés á mfá ye áwú, ve fáve ébe é dúmá Nzamá, ná é Mwán Nzamá á ñɔŋ dúmá ébe éwɔ.”

⁵(Ve Yesus ñí a ngá dziŋ Marta, bá mwanñan, ya fe Lásaro.) ⁶Éde niané a ngá wók ná a ne nkúkwann ané a ngá bera lígi a tɔ́ é vóm á mbé tán melú mé beañ. ⁷Nia véa, éde a ngá dzó báyága ná, “Bí beragán ke á Judea.”

⁸Ané beyága bá bé ngá dzó ñí ná, “Á Rabí, betébosú béye bejudio bé ndem wa ye álúm mekwá. Ye ná wa ó nga bera yaá ke ó wéñ?”

⁹Éde Yesus a ngá yalan ná, “Nde dzóp dēé belé awóm méwola ya méwola mé beañ? Ngé mot aa wulu ó mos, áá kɔp obaá, amú aa yén eyéá ye éniŋ dzí. ¹⁰Ve ngé mot enziŋ aa wulu á alú, aa kɔp obaá, amú ná eyéá é sés ébe éñe.” ¹¹Niané a ngá mana dzó mam méte, ané ngá dzó b́ ná, “Mvwíññ dzea Lásaro é ntɔ́ óyó; ve ma ke á mfá ye ná me suk ñí óyó.”

¹²Éde beyága bá bé ngá dzó ñí ná, “Á Ntí, ngé a ne óyó, aa ye tɔbo mvwaá.” ¹³(Yesus ñí a ngá kóbo á mfá áwú Lásaro; ve beyága bá bé ngá tém ná aa dzó ya óyó mot áse aa ke.)

¹⁴Véa éñe Yesus a ngá túga b́ kelan ná, “Lásaro a wú yaá, ¹⁵éde fe ma sán ákála denan, amú ná máá tɔ́ ó wéñ, á mfá ye ná míní bwíni. Ve bí keŋán é vóm a ne.”

¹⁶Ané é Tomás (éñí bé ngá lwée ná mbyás) a ngá dzó báyága bevɔ́ó ané éñe ná, “Bía bí keŋán fe á mfá ye ná bí kean fe wú bíabe b́.”

Yesus aa wómo Lásaro

¹⁷Éde Yesus a ngá sian, a koan ná avé bé dzep ñí ó sɔŋ é ntɔ́ melú mé nii. ¹⁸(Betania ñí a mbé fe bebeñ ya Yerusalen tán ané mekwá mé léa, ¹⁹éde abwiññ bot béye bejudio bé ngá mana ś ébe Marta bá María, ná bá nzu tɔbo ya b́ akála é ndóm deba.)

²⁰Niané Marta a ngá wók ná Yesus á nga sian yaá, ané a ngá ke toban ya ñí; ve María ñí aá lígi a tɔ́ ósí á ndá. ²¹Ané Marta a ngá dzó Yesus ná, “Á Ntí, ngé á b́ ná o b́ ó vá, ngé ndóm dam deé ndzí wú. ²²Ve ma yem fe ná, atwaa éndagá, é dzam áse wa dzaa Nzamá, Nzamá aa ye wa dɔ vé.”

²³Éde Yesus a ngá dzó ñí ná, “Ñu ndóm da ye wómo.”

²⁴Ané Marta a ngá yalan ya ñí ná, “Ma yem ná aa ye wómo éyɔŋ miwúán myá ye wómo, é mos wá śgán.”

²⁵Éde Yesus a ngá dzó ñí ná, “Ma me ne nwómán miwúán ya fe eniŋ; éñí áse aa bwíni ma afánɔ ná aa wú, aa ye niŋ; ²⁶éñí áse ñí aa niŋ aa bwíni fe ma, áá ye wú amvála enziŋ. Ye wa bwíni dɔ?”

²⁷Ané Marta a ngá yalan ya ñí ná, “Á Ntí, áá, me bwíni yaá ná wa o ne Kristo, é Mwán Nzamá éñí aa nzu é sí ñí.”

²⁸Éde ñí eé dzó dɔ, ané a ngá ke lwée mwanñan María évwíñ, a dzó ñí ná, “Nyágale a ntɔ́ vá, aa lwée fe wa.” ²⁹Éde niané a ngá wók dɔ, ané ñí a ngá dzíga fe tébe avóó, a keñ ébe éñe. ³⁰(Ákoan Yesus a ngén é vóm Marta a ngá ke toban ya ñí, kaa ná á ñíí á dzeá été.) ³¹Éde bejudio bé mbé á ndá ná bá nzu tɔbo ya ñí, niané bé ngá yén María aa dzíga kólo ó

sí a kwíñ átán, éde bé ngá bee ní, béé tém ná aa ke ó sɔŋ ná éñe aa ke yi ó wéñ.

³²Éde María a ngá ke é vóm Yesus a mbé, niané a ngá yén ní, éde a ngá ku ní mébo ó sí, eé dzó ní ná, “Á Ntí, ngé á bo ná o bo ó vá, ngé ndóm dam deé ndzí wú.”

³³Éde niané Yesus a ngá yén ní eé yi, ya fe bejudio bé ngá ke bá bee ní bá béé yi fe, á nga bíra wórán abé á nsísim été, á nga tɔbo fe ya eywiññ.

³⁴Ané a ngá síli ná, “Mínaá bwíi ní vóm mbé?”

Éde bé ngá dzó ní ná, “Á Ntí, nzaá yén.”

³⁵Yesus á nga yi. ³⁶Véa éñe bejudio bé ngá dzó ná, “Yénɲán nzá ámvála á ngá dziŋ ní.”

³⁷Ve bevóó béye été bá bé ngá dzó ná, “É mot a ngá señ ndzindzím ní, ye ná áá tɔɔ fe bo ná Lásaro a táa wú?”

³⁸Éde Yesus a ngá bera daŋ wórán mitéñ á nlém weñ été, véa aa kéñ á sɔŋ. (Aa mbé ndá ákwá, akwá dá é mbé fe éyénɲán do áyóp.) ³⁹Ané Yesus a ngá dzó ná, “Veagán akwá.” Véa éñe Marta, kéá ye á nwú, a ngá dzó ní ná, “Á Ntí, á nga num yaá, amú ná á ntɔɔ melú mé nii.”

⁴⁰Éde Yesus a ngá síli ní ná, “Ye ná máá dzó yaá wa ná, ngé wa bwíni, wa ye yén é dúmá Nzamá?”

⁴¹Ané bé ngá vea akwá. Éde Yesus a ngá bére mís ó yóp eé dzó ná, “Á Tará, ma vé wa akíba amú ná o wók yaá ma. ⁴²Éde, me mvá fe yem ná wa wók ma eyɔŋ ése; ve me dzó do akála nkuna bot wá boman ma, á mfá ye ná bé bwíni ná wa o lóm yaá ma.”

⁴³Éde, eé dzó dzam te, ané a ngá yónán ya kíŋŋ oyaáp ó yóp ná, “Lásaro, kwíñŋe átán!” ⁴⁴Éde éñí á mbé nwú a ngá kwíñ átán, a tɔɔ nwógán á bitóp été ó mó ya mebo; ású deñ dá é tɔɔ mvígílán á nɛpken été.

Ané Yesus a ngá dzó bó ná, “Tsiigán ní, míní lík ní ná á ke!”

Bá bo eswaá ná bá ywíñ Yesus

⁴⁵Dzam te édo abwiññ bejudio é ngá nzu ébe María, niané bé yén edí a ngá bo, éde bé ngá bwíni ní. ⁴⁶Ve bevóó benziŋ bá bé ngá ke ébe befariseo, bé kat bó fwéñ é dzam Yesus a ngá bo. ⁴⁷Ané betébosú befára ya befariseo bé ngá bo ekóánn betébosú, béé dzó ná, “Nzá dzam bía bo? Amú ná é mot ní á nga bo yaá abwiññ biyágán mendem. ⁴⁸Ngé bí lík ní néa, bot bése bá ye ní bwíni, véa bwann beromano bá ye só, bé vea bía é vóm wea, ya fe áyɔŋ dea.”

⁴⁹Éde Kaifas, mot mbóó ye ébe bó, ntébosú befára ye á mbú te, a ngá dzó bó ná, “Míní ne kaa yem dzam enziŋ, ⁵⁰ye mínáá nú táŋ ná, é ne mvéañ ná mot mbóó éñe á wú ákála bot bése, se ná ayɔŋ ngúrá édo é mana dzán.” ⁵¹(Ve eé ndzí dzó dzam te ébe á mfá weñ émyen; ve fáve ná éñe a tɔɔ ntébosú befára ye á mbú te, aá kúlán ná Yesus á nkún wú ákála

ayɔŋ ngúrá. ⁵²Se ki fáve ákála ayɔŋ etámm, ve ya fe ná áfulan é bwán Nzamá bé ne myeann.) ⁵³Édo ná, atée ye mos te, éñe bé ngá kík ná bá ywíñ ní.

⁵⁴Ya dzam te édo Yesus éé ngá bo fe eé wulu á bot été énzézan bejudio, fáve ná a ngá kólo ó véa a kéñ áberɛŋ sí é mbé bebeñ éyáŋɛ été, é kisoan bá lwée ná Efraím, ané a ngá tɔbo ó weñ bábe beyága.

⁵⁵Ákoan ná é fét Paskua bejudio eé ntɔ́ bebeñ, éde abwiññ bot ye mevóm mése é ngá mana bét á Yerusalen kaa ná fét eé bo, ná bá ke fúbu méñúu meba bébyen. ⁵⁶Véa bé nga dzéŋ Yesus, béé ke bá tébe á templo béé kɔbo bevɔ́ ya ébá bevɔ́ ná, “Mína yén á yá? Ye ná áá ye sɔ́ ó fét?”

⁵⁷(Ákoan ná betébosú befára ya befariseo bé mánan yaá ná, ngé mot enziŋ aa yem é vóm Yesus a ne, á kéŋ do kat fwéñ, á mfá ye ná bé biñ ní.)

Miningá aa wáa Yesus mbwánn

12 ¹Ákoan ná melú mé saman mé nga dzéŋ yaá ná é fét Paskua eé ku, éde Yesus a ngá sian á Betania é vóm Lásaro a mbé, éñí Yesus a ngá wómo míwúán été. ²Ané bé ngá bo ní bidzí ó véa, Marta éñe a ngá belan ya bot, Lásaro ní a mbé mot mbɔ́ ye é bot bábe bó bé mbé bé tɔ́ ó téble.

³Éde, María a ngá twáa mbwánn enum nardo ébyen etun litro, ó tɔ́ mora tán, á nga wáa wo Yesus mébo, eé fími fe ní mebo ya esií deñ. (Ané ndá ngúrá e nga dzéñ ya énum mbwánn te.)

⁴Ve mot mbɔ́ ye béyága beñ, Judas Iskariote, éñí a mbé ná á nkún ní kuan, a ngá dzó ná, ⁵“Amú dzé báá tɔ́ kuan mbwánn enum wí tán bedenario mitet mí léa, bé kee moann te mitétéññ?” ⁶(Ve Judas a ngá dzó do, se ná aa yén mitétéññ engóngɔ́, fáve amú ná a mbé ndzídzip, dá é tɔ́ fe ná éñe a mbé a belé ekpea moann, a ngá bo eé dzíp é dzóm bé ngá bo béé nii été.)

⁷Ané Yesus a ngá dzó ná, “Líkge ní, a ngá baale wo á mfá é mos ye á ndzepbann á sɔŋ wɔm. ⁸Mína mína ye fe belé mitétéññ eyɔŋ ése ébe mína, ve ma mínáá ye ma belé eyɔŋ ése.”

⁹Éde mora nkuna bejudio ó ngá wórán ná Yesus a ne ó véa, ané bé sɔ́, se fáve ákála Yesus, ve ya fe ná bá yén Lásaro, éñí Yesus a ngá wómo míwúán été. ¹⁰Ve betébosú befára bé ngá kík ná bá ywíñ fe Lásaro, ¹¹amú ná ákála deñ édo abwiññ bejudio é ngá kólo ya do ébe bó, bé nga bwíni Yesus.

Yesus aa níi á Yerusalen

¹²É mos ó ngá belan véa, niané é mora nkuna bot ó ngá sɔ́ ó fét ó ngá wók ná Yesus aa nzu á Yerusalen, ¹³bé nga ñɔŋ mitem mélénn, éde bé ngá ke ní ñɔŋ, béé yónán ná,

“Osana! Abwará ya éñí aa nzu

ébe éyola Ntí,
Kéza ye Ísrael.”

¹⁴ Ané Yesus a ngá koan ya mwann edzakás, éde ngá dan̄ a tɔbo ñí áyóp, amvála ané é ne ntsilann ná,

¹⁵ “Á mot ye á Sión, o táa kɔ wɔɲɲ.
Dággé ná, é Kéza we aa nzu
á tɔɔ á mwann edzakás áyóp.”

¹⁶ (Béyága béñ béé ndzí dɔ tára yem, ve fáve éyɔɲ Yesus a ngá tɔbo á dúmá été, véa éñe bé ngá síman ná dzam te é ngá tɔbo ntsilann á mfá weñ, ya ná édo fe bé ngá bo ñí ya dɔ mam méte.)

¹⁷ Ané nkuna bot wá ó ngá vé fe ngañiá, éwí ó mbé bábe bó éyɔɲ a ngá lwée Lásaro ó sɔɲ, eé wómo fe ñí á miwúán été. ¹⁸ Ya dzam te fe nkuna bot ó ngá ke ñí ñɔɲ, amú bé ngá wók ná aá bo eyágán ndem te. ¹⁹ Véa éñe befariseo bé ngá dzó bébyen ya bébyen ná, “Yénɲán ná mínáá wún dzóm enziɲ, eniɲ ngúra é nga bee yaá ñí á mvús!

Yesus aa lére é dúmá deñ ébe áwú

²⁰ Véa bwann begriego bé mbé, bevóɔ benziɲ béye ébá bé ngá bét fe ó fét á mfá ákaɲ. ²¹ Éde ébá béte bé ngá ke koan ya Felipe, éñí a mbé mot ye é Betsaida ye á Galilea, bé nga dzaa ñí ná, “Á ndzwée, bíá kómo yén Yesus.” ²² Ané Felipe ñí a ngá ke dɔ ádzó Andrés, éde Andrés bá Felipe bá bé ngá ke fe dɔ ádzó Yesus.

²³ Ané Yesus a ngá yalan ya bó ná,

Áwola é kwíñ yaá, ná é Mwán Mot á ñɔɲ dúmá. ²⁴ Bébélá ya bébélá ma dzó mína ná, ngé nsó trigo wáá ku ó sí, ó wéñ fe, éwɔ etámm ó ne. Ve ngé ó wéñ, wá wúm abwiññ bibumá. ²⁵ Éñí aa dziɲ éniɲ dzeñ, aa ye dɔ dzímle; ve éñí ñí aa víni éniɲ dzeñ é sí ñí, aa ye dɔ baale á mfá éniɲ é ne mbéámbéá. ²⁶ Ngé mot enziɲ a séan ya ma, á beegé ma; é vóm mé ne, ó véa fe é mot ñí aa séan ya ma ñí aa ye tɔbo. Ngé mot enziɲ aa séan ya ma, Tará aa ye ñí vé esémm.

²⁷ Éndagá, ma wórán abé á nsísim wɔm été. Éde me dzó á yá, ye ná, ‘Á Tará, korogé ma ébe áwola dí été?’ Ve dzam te édo, ma me sɔ yaá ya dɔ ébe áwola dí. ²⁸ Á Tará, vá éyola dwe dúmá!

Ané kíɲɲ e ngá sɔ á dzóp été ná, “Me vé yaá dɔ dúmá, ma ye fe dɔ bera vé dúmá.” ²⁹ Ya dzam te édo nkuna bot ó mbé ó téle ó véa, weé wók fe dɔ ó ngá dzó ná, “A tɔɔ eduɲɲ ndzalán;” ébá bevóɔ bá ná, “Angel enziɲ éñe a mvá kɔbo ya ñí.”

³⁰ Éde Yesus ñí a ngá yalan ná, “Se ákála dam édo kíɲɲ te eé bo, ve fáve ákála denan. ³¹ Éndagá, nkíkán misaɲ ye éniɲ dzí ó ntɔɔ; éndagá,

ntébosú ye éniŋ dzí bá ye ñí wea átán. ³²Édo ná, niané ma ma ye tɔbo mbélánn óyóp ébe é sí ñí été, ma ye dulu bot bése ébe mámyen.” ³³(A ngá dzó dzam te eé lére nzá ámvála awú á mbé ná á nkún wú.)

³⁴Éde nkuna bot ó ngá yalan ya ñí ná, “Bí wók yaá á nkɔ́ métsiŋ été ná Kristo aa ye tɔbo kómm ya kómm. Éde, o ne dzó á yá ná, ‘É Mwán Mot aa yian tɔbo mbélánn óyóp?’ Nzá ki ñí a ne é Mwán Mot te?”

³⁵Ané Yesus a ngá dzó bó ná, “É ngén oyomm tám ná eyéá é ne ébe mína. Wulugán éyɔŋ míní belé eyéá, á mfá ye ná dzíbi é nza mína biñ. Éñí ñí aa wulu fe ó dzíbi ósí, áá yem é vóm aa ke. ³⁶É tám míní ngén míní belé eyéá, bwíniŋan eyéá te á mfá ye ná míní bɔ bwán béye eyéá.”

Mbwínánn ya nlém aleét

Niané Yesus a ngá mana kóbo mam méte, éde a ngá kólo, a sɔbo énzénzaŋ deba. ³⁷Ve afáŋbɔ ná a ngá bɔ abwiññ biyágán mendem ébe ású deba, bá bée ngá bwíni ñí; ³⁸á mfá ye ná éfía nkúlu medzó Esaía é dzálában, édí a ngá dzó ná,

“Á Ntí, nzá a bwíni yaá é fwéñ dzea?
Nzá ki é nguu edzwée Ntí
é léreban yaá ébe éñe?”

³⁹Dzam te édo bée mbé bwíni ya dɔ; amú Esaía a ngá bera fe dzó ná,

⁴⁰“A dzip yaá é mís meba,
a bɔ yaá fe nlém weba aleét;
á mfá ye ná bé táa yén ya mís,
bé bɔ fe kaa wórán ya nlém;
véa bé dzoban, ma me séñ fe bó.”

⁴¹Esaía aá dzó dɔ, amú ná aá yén é dúmá deñ, aá kóbo fe á mfá weñ.

⁴²Ve afáŋbɔ néa, abwiññ bot énzénzaŋ betébosú été, baá bwíni ñí, ve akála befariseo, bée ngá mem dɔ, á mfá ye ná bé nza tsílán ya bó á sinagoga; ⁴³amú ná bé ngá dziŋ é dúmá bot álot é dúmá Nzamá.

Mésugán bífiá Yesus á bot été

⁴⁴Éde Yesus a ngá yónán ná,

Éñí aa bwíni ma, se ma aa bwíni, ve fáve ébe éñí a lóm yaá ma.
⁴⁵Éñí aa yén ma, aa yén fe éñí a lóm yaá ma. ⁴⁶Me sɔ yaá ané eyéá ye éniŋ dzí, á mfá ye ná éñí áse aa bwíni ma, á bɔ kaa tɔbo ó dzíbi ósí.

⁴⁷Ngé mot enziŋ aa wók bífiá byam, éñe kaa byɔ́ ádzálá, mää kík ñí nsar, amú ná meé ndzí sɔ éniŋ dzí á mfá ákík misar, ve fáve á mfá ákoro eniŋ. ⁴⁸Éñí aa tep ma, éñe kaa ki áñɔŋ bífiá byam, á mbelé éñí aa

kík ñí nsarj, éfiá me kóbo yaá édo dá ye ñí kík misarj é mos wá súgan. ⁴⁹Amú ná, meé ndzí kóbo ya é nguu dzam mámyen, ve fáve ná é Tará émyen a lóm yaá ma, a vé yaá ma mvéná ébe édí ma yian dzó ya édí ma yian kóbo. ⁵⁰Ma ma yem fe ná é mvéná deñ é ne éniñ é ne mbéámbeá. Dzam te édo, édí ma kóbo, ma kóbo do amvála ané Tará a dzó yaá ma do.

Yesus aa sop beyága mebo

13 ¹Kaa ná fét Paskua eé ku, Yesus eé yem ná áwola deñ é kwíñ yaá ná aa kólo éniñ dzi a keñ ébe Tará. Aá dziñ áabeñ bé mbé ébá béye é sí ñí, aá dziñ fe bó akekwiñ asúgánn.

²Éde, éyɔɔ bé ngá dzi bidzí bíye alú; ákoan ná débale a sɔgle yaá nlém Judas, é mwán Simón Iskariote, ná á kuan Yesus.

³Yesus ñí eé yem ná Tará aá kee ñí mam mése é mó meñ été, ya fe ná, aá sɔ ébe Nzamá, éñe fe aa búlán ébe Nzamá; ⁴ané a ngá tébe ó téble, a swálá étóp deñ, a twáa táwólá, a bán ñí ángérgá. ⁵Éñe véa a ngá swii mendzím á falaŋgána été, á nga tára ná aa sop beyága mebo ya á fími fe bó mo ya é táwólá a mbé a bán ñí ángérgá.

⁶Ané a ngá sian ébe Simón Pedro, ané ñí a ngá dzó ñí ná, “Á Ntí, ye ná wa wa sop ma mebo?”

⁷Éde Yesus a ngá yalan ya ñí ná, “Wáá bé yem édí ma bo éndagá, ve wa ye do yem niané é mam má má ye lot.”

⁸Ané Pedro a ngá dzó ñí ná, “Wáá ye me sop mebo tám enziñ.” Véa Yesus ñí a ngá yalan ya ñí ná, “Ngé mää sop wa mebo, wéé belé ngap ébe ma.”

⁹Éde Simón Pedro a ngá dzó ñí ná, “Á Ntí, se fáve mebo etámm, ve ya fe binam ya nló.”

¹⁰Ané Yesus ñí a ngá dzó ñí ná: “Éñí á wóbán yaá, fáve mebo etámm émo aa sop, akála ná á ntɔɔ mfúbánn ásesé. Éde mína míní ntɔɔ mifúbánn, ve se mína bésesé.” ¹¹(Amú ná a ngá yem nzá aa ye ñí kuan; dzam te édo a ngá dzó ya do ná, “Se mína bésesé míní ne mifúbánn.”)

¹²Éde niané a ngá mana bó sop mebo, ané a ngá twáa bitóp byeñ, véa a bera tɔbo, á nga dzó bó ná,

Ye mína yem nzá dzam me bo yaá mína? ¹³Mína lwée ma ná, ‘Nyágale ya Ntí,’ mína kóbo mvéañ, amú ná me ne do. ¹⁴Édo ná, ngé ma Ntí ya Nyágale, me mvá mína sop mebo, mína mína yian fe sopban mebo bevóó ya ébá bevóó; ¹⁵amú ná me vé yaá mína efonann á mfá ye ná ámvála me bo yaá mína, mína boŋán fe. ¹⁶Ma dzó mína bébélá ya bébélá ná, oloá wáá lot é mása weñ, nlómánn wá wáá lot ki éñí aá lóm ñí. ¹⁷Ngé mína yem é mam má, mvɔmm ya mína ngé mína dzálá mo.

Yesus aa lére éndéndañ ná nyága mbóó á nga nzu yaá ñí kuan

¹⁸Mää kóbo ya mína bésesé. Ma yem ébá me tɔp yaá. Ve á mfá ye ná Ntsili ó dzálában ná, ‘Éñí aa dzi mfém m wɔm a tébe yaá ma á

ngamm áyát.’¹⁹ Ma tára mína dɔ dzó éndagá, kaa ná é bɔban, á mfá ye ná éyɔŋ dá ye bɔban, míní bwíni ná Ma Me Ne.²⁰ Ma dzó mína bébélá ya bébélá ná, éñí aa ñɔŋ é mot ma ye lóm, ma ní aa ñɔŋ, éñe ní aa ñɔŋ fe ma, aa ñɔŋ éñí aá lóm ma.

²¹Éde Yesus eé dzó dɔ, á ŋga wórán abé á nsísim été, ané á ngá vé ngañiá ná, “Ma dzó mína bébélá ya bébélá ná, mot mbɔ́ɔ ye ébe mína aa ye ma kuan.”²² Véa beyága bé ŋga ke bá dággán bevɔ́ɔ ya ébá bevɔ́ɔ, bé tɔ́ɔ nzamzámán ya ná, nzá aa dzó ya ní.

²³Éde nyága mbɔ́ɔ ye béyága beñ, éñí Yesus a ngá dziŋ, a mbé a yága Yesus ó twíñ.²⁴ Ané Simón Pedro a ngá vé ní ndem ná aa síli ná aa dzó ya nzá.”

²⁵Éde éñí a mbé a yága Yesus ó twíñ a ngá dzó ní ná, “Á Ntí, a ne nzá?”

²⁶Ané Yesus a ngá yalan ná, “A ne éñí ma ye vé mfém m ma du.” Éde niané a ngá du mfém m, a ñɔŋ wɔ a kee fe wɔ Judas, é mwán Simón Iskariote.

²⁷Niané Judas a ngá ñɔŋ mfém m te, ané Sátan a ngá níi ébe éñe.

Éde Yesus a ngá dzó ní ná, “Édí wa nzu bɔ, bɔ́ɔge dɔ avóó.”²⁸ (Ve mbɔ́ɔ enziŋ ye bábe bɔ́ bé mbé bé tɔ́ɔ ó téble, eé ndzí yem akála dzé aá dzó ní dɔ; ²⁹amú ná bevɔ́ɔ benziŋ bé ngá tém ná akála Judas éñe a mbé a belé ekpea moann, édɔ Yesus a ngá dzó ya ní ya dɔ ná, aa ke kus é byém bá yi ó fét; ngé ki ná, á vé mitétéññ dzóm enziŋ.)³⁰ Éde niané Judas a ngá ñɔŋ mfém m, véa a kwíñ átán. (Á koan ná alú é ntɔ́ɔ.)

Yesus aa kat fwéñ ye étɔ́ɔ dúmá deñ

³¹Éde, éyɔŋ a kwíñ yaá átán, ané Yesus a ngá dzó ná,

Áwola dí é Mwán mot a ñɔŋ yaá dúmá, Nzamá ní a ñɔŋ yaá fe dúmá ébe éñe.³² Édɔ ná, ngé Nzamá aa ñɔŋ dúmá ébe éñe, véa Nzamá aa ye ní vé dúmá ébe émyen, á nkún fe ní ánzú vé dúmá.

³³Á bɔ́ŋŋ,

me ngén me tɔ́ɔ bíabe mína oyomm abɔ́ŋŋ tám.

Mína ye ma dzéŋ,

ámvála me ngá dzó betébosú béye bejudio,

mína ma dzó fe dɔ éndagá ná, ‘Míní sés nzu é vóm ma ke.’

Mfefeñ mvéná

³⁴Ma vé mína mfefeñ mvéná, ná míní dziŋan bevɔ́ɔ ya ébá bevɔ́ɔ, ámvala me dziŋ yaá mína, amvála te mína dziŋŋán fe bevɔ́ɔ ya ébá bevɔ́ɔ.³⁵ Ébe édí te bot bésesé bá ye yem ná míní ne béyága bam, ngé míní belé edziŋŋ bevɔ́ɔ ya ébá bevɔ́ɔ.

Yesus aa lére ná Pedro aa ye ní kat

³⁶Ané Simón Pedro a ngá síli ní ná, “Á Ntí, wa ke ó vé?” Éde Yesus a ngá yalan ya ní ná, “O sés ma bee éndagá ébe é vóm ma ke, ve wa ye ma súgan bee.”

³⁷Ané Pedro a ngá sili ní ná, “Á Ntí, amú dzé me sés wa bee éndagá? Ma ye kee éniḡ dzam ákála dwe.”

³⁸Éde Yesus ní a ngá yalan ná, “Ye wa ye kee éniḡ dzwe ákála dam? Ma dzó wa bébélá ya bébélá ná, kaa ná nnóm kúp á lḡḡ, ákoan ná o kat yaá ma táḡ biyḡḡ bí léa.”

Yesus aa kúlán nzenn

14 ¹“Kaa tḡbán nzamzámánn á milém myenan été. Mína bwíni Nzamá, bwíniḡán fe ma. ²É ndá Tará é ne ya abwiññ bitḡbḡga; ngé é bḡ kaa bḡ néa, ngé me dzó yaá mína dḡ; amú ná ma ke koman vóm á mfá wenan. ³Éde, ngé me kéñ, me koman fe vóm á mfá wenan, ma ye bera sḡ, véa mámyen me ñḡḡ mína, á mfá ye ná mína míní tḡbḡ fe é vóm me tḡḡ. ⁴Mína mína yem fe nzenn ye é vóm ma ke.”

⁵Ané Tomás a ngá dzó ní ná, “Á Ntí, bíá yem vóm mbé wa ke, é ne bíá yem nzenn á yá?” ⁶Éde Yesus a ngá dzó ní ná, “Ma me ne Nzenn, ya Bébéla, ya fe Eniḡ. Mot enziḡ ḡá ye ke ébe Tará, kaa ané fáve ébe ma. ⁷Ngé á bḡ ná míní yem yaá ma, ngé mína aa ye fe yem Tará. Atéé ye éndagá, mína yem ní, míní yén yaá fe ní.”

Yesus aa kúlán Tará Nzamá

⁸Ané Felipe a ngá dzó ní ná, “Á Ntí, sígégé bíá lére Tará, véa a mana.”

⁹Éde Yesus a ngá dzó ní ná,

Á Felipe ye ná ábímm tám me tḡbḡ yaá bíabe mína, ye ná ó ngén kaa ma yem? Éñí a yén yaá ma, a yén yaá Tará; wa dzó á yá ná, ‘Léregé bíá Tará?’ ¹⁰Ye wáá bwíni ná me ne ébe Tará, Tará ní a ne fe ébe ma? Bífíá ma kḡbḡ mína, máá kḡbḡ byḡ ya é nguú dzam mámyen, ve é Tará a tḡḡ ébe ma, éñe a lére míbḡann myeñ.

¹¹Bwíniḡán ma ná me tḡḡ ébe Tará, Tará fe ébe ma. Ngé é sés néa, bwíniḡán ákála míbḡann míbyen. ¹²Ma dzó mína bébélá ya bébélá ná, éñí aa bwíni ma, míbḡann ma bḡ ní aa ye fe myḡ bḡ; aa ye bḡ émí myá daḡ ya minén ya émí, amú ná ma ke ébe Tará. ¹³Éde édí áse mína dzaa ébe éyola dam, ma ye dḡ bḡ, á mfá ye ná Tará á ñḡḡ dúmá ébe Mwán. ¹⁴Ngé míní dzaa ma dzam ébe éyola dam, ma ye dḡ bḡ.

Ngaá Mfúfúp Nsísim

¹⁵Ngé mína dziḡ ma, mína ye baale mémvéná mam. ¹⁶Véa ma ye dzaa Tará, ané ní aa ye fe mína vé Mfoḡ milém mfé, ná á tḡbḡ mínabe bḡ kḡmm áse. ¹⁷Nsísim ye á bébélá éñí bot béye é sí ní bé sés ñḡḡ, amú ná báá yén ní, báá yem ki ní. Ve mína, mína yem ní amú ná a tḡḡ mínabe bḡ, aa ye fe mína tḡbḡ été.

¹⁸Máá ye mína lík bḡbéñúḡḡ; ma ye nzu ébe mína. ¹⁹Oyomm abḡḡḡ tám, bot béye é sí ní báá ye ma bera yén. Ve mína, mína ye

ma yén; amú ná me ne ntétéá, mína mína ye fe tɔɔ betétéá. ²⁰Tám te édo mína ye yem ná me ne ébe Tará, mína míní ne ébe ma, ma me ne fe ébe mína. ²¹Éñí a belé mémvéná mam, a baale fe mɔ, mot te éñe aa dziŋ ma. Éde éñí ní aa dziŋ ma, Tará aa ye ní dziŋ; ma ma ye fe ní dziŋ, véa mámyen me léreban ébe éñe.

²²Ané Judas (se éñí Iskariote) a ngá síli ní ná, “Á Ntí, dzé é bɔ yaá ná éñe wámyen wá ye léreban fáve ébe bía, ve se ébe bot béye é sí ní?”

²³Véa Yesus ní a ngá yalan ya ní ná,

Ngé mot aa dziŋ ma, aa ye baale éfíá dam; véa Tará aa ye ní dziŋ; éde bía ye sɔ ébe mot te, bí bɔ etɔɔbɔga ébe éñe. ²⁴É mot áá dziŋ ma, áá baale bífíá byam; éfíá dá mína wók dí, é sés áandam, ve fáve édí éñí a lóm yaá ma, édí Tará.

²⁵Me dzó yaá mína é mam má, me tɔɔ bíabe mína.

²⁶Ve Mfoŋ milém, Mfúfúp Nsísim, éñí Tará aa ye lóm ébe éyola dam, aa ye mína yágale mam mése, aa ye fe mína vé osímánn ye é dzam áse me dzó yaá mína.”

²⁷Ma lík mína ya mvwaá, é mvwaá dam édo ma vé mína; máá vé mína do ané éniŋ dzí dá vé do. Milém myenan mí táa kelebe óyóp, mí táa ki kɔ wɔŋŋ.

²⁸Míní mvá wók ané ma dzó mína ná, ‘Ma ke, véa ma ye bera sɔ ébe mína.’ Ngé á bɔ ná mína dziŋ ma, ngé mína ye sán ná ma ke ébe Tará; amú ná Tará éñe aa daŋ ya ma.

²⁹Éde ma me dzó yaá mína do éndagá, kaa ná é bɔban, á mfá ye ná éyɔŋ dá ye bɔban, míní bwíni. ³⁰Máá ye fe daŋ bera ákɔɔ bíabe mína, amú ná ndzwée ye éniŋ dzí á nga nzu yaá, ní éé belé ki dzam enziŋ ébe ma. ³¹Ve á mfá ye ná bot béye é sí ní bé yem ná ma dziŋ Tará, ya ámvála Tará a ngá mánan ma, néa éñe ma bɔ.

Tébegán, bí kólogán ó vá.

Yesus éñe a ne ñá mfaŋ ndzík

15 ¹Ma me ne ñá mfaŋ ndzík, Tará éñe ní a ne mbeñ afúp. ²Mfás óse ye ó ne kaa wúm bibumá ébe ma, aa vea wɔ; éwí áse wá wá wúm bibumá, aa kpára wɔ ná ó tɔɔ mfúbánn; á mfá ye ná ó daŋdaŋ wúm bibumá. ³Mína míní ntɔɔ mifúbánn akála éfíá me kɔɔ yaá mína.

⁴Tɔɔgán mbán ébe ma, ma fe ébe mína. Ntéññ mbɔɔ ané mfás ndzík ó sés wúm bibumá ébyen etámm, ngé wá kaa tsinibe á ndzík, amvála te fe mína ngé mína kaa átɔɔ mbán ébe ma. ⁵Ma me ne ndzík, mína mifás. Éñí aa tɔɔ mbán ébe ma, ma fe ébe éñe, éñí te aa wúm abwiññ bibumá, amú ná nkánán ya ma, míní sés bɔ dzam enziŋ. ⁶Ngé mot aa bɔ kaa átɔɔ mbán ébe ma, bá ye ní wea ó féñ ané mfás, ní a mana fe kót; véa bé kóán myɔ, bé wea myɔ á ndúán été, myá mí nga dzík fe.

⁷Ngé míní tɔɔ mbán ébe ma, bífíá byam byá bí tɔɔ fe mbán ébe mína, dzaagán édí mína kómo, dá dá ye fe mína boban. ⁸Ébe dzam te édo Tará aa ñɔɔ ya do dúmá, ná míní vé abwiññ bibumá, néa éñe fe mína lére ná míní ne béyága bam. ⁹Amvála ané Tará a dziɔ yaá ma, amvála te fe ma me dziɔ yaá mína; tɔɔgán mbán édziɔɔ dam été. ¹⁰Ngé míní baale mémvéná mam, mína ye tɔɔ mbán édziɔɔ dam été, amvála ané ma me baale yaá mémvéná Tará, ma tɔɔ fe mbán édziɔɔ déñ été.

¹¹Me kɔɔ yaá ya mína é mam má, á mfá ye ná mésán mam mé ne tɔɔ ébe mína, ya fe ná mésán menan mé ne tɔɔ ndzálán abóm.

É mvéná Yesus

¹²É mvéná dam édo ñí ná, míní dziɔɔnán bevɔɔ ya ébá bevɔɔ, amvála ané ma me dziɔ yaá fe mína. ¹³Mot enziɔ éé belé édziɔɔ dá daɔ édí, ná mot aa kee éniɔ dzeñ ákála bemvwiññ. ¹⁴Míní ne bemwíi, ngé mína ɔ édí ma mánan mína. ¹⁵Máá bera fe mína lwée ná aloá, amú ná oloá wáá yem édí é mása weñ aa ɔ. Ve ma me lwée yaá mína ná bemwíi, amú ná me lére yaá mína édí áse me wók yaá ébe Tará.

¹⁶Se mína mínaá tɔɔ ma, ve fáve ná ma maá tɔɔ mína, me téle yaá fe mína ná, míní ke míní wúm bibumá, ya fe ná ébumá denan é tɔɔ mbán, á mfá ná édí áse mína dzaa Tará ébe éyola dam, á vé mína do. ¹⁷Édí, édo ma mánan mína ná, míní dziɔɔnán bevɔɔ ya ébá bevɔɔ.

Mot binam a ne ya nlém abé

¹⁸Ngé bot béye é sí ñí bá víni mína, yemɔnán ná ma baá tára víni. ¹⁹Ngé míní ɔ ébá béye é sí ñí, ngé bot béye é sí ñí bá dziɔ mína ané áabeñ. Ve dá é tɔɔ ná míní sés ébá béye é sí ñí, ve fáve ná maá tɔɔ mína ébe é sí ñí été, dzam te édo bot béye é sí ñí bá víni mína ya do. ²⁰Símaɔnán éfíá me mvá mína kɔɔ ná, ‘Oloá wáá lot é mása weñ.’ Ngé ma bé dzéɔ yaá ásí, mína bá ye fe dzéɔ ásí; ngé bé baale yaá éfíá dam, bá ye fe baale áadenan.

²¹Ve bá ye mína ɔ mam méte mése ákála éyola dam, amú ná béé ndzí yem éñí aá lóm ma. ²²Ngé me ɔ kaa ásó, kaa ki ákɔɔ ya ɔ, ngé béé belé nsémm. Ve éndagá, ébe nsémm weba, báá bera fe belé mekéá.

²³Éñí aa víni ma, aa víni fe Tará. ²⁴Ngé me ɔ kaa áɔ míɔɔann mot enziɔ áá bé tára ɔ énzénzaɔ deba été, ngé béé belé nsémm. Ve éndagá bé yén yaá myɔ, bé víni yaá fe átára ye ma, akekwiñ ébe Tará. ²⁵Ve édí te, á mfá ye ná éfíá é ne ntsilann á nkɔɔ métsiɔɔ weba é dzálában ná, ‘Baá víni ma, kaa akéá.’

²⁶Éde niané Mfoɔ milém a sɔ yaá, éñí ma ye mína lóm, mfá ébe Tará, Nsísim ye á bébéla éñí aa sɔ ébe Tará, éñe aa ye vé ngañiá á

mfá wɔm, ²⁷mína ntéñ mbóó fe, mína mína ye fe vé ngañiá, amú ná míní tɔbɔ yaá bíabe mína atéé ye átáraga.

16 ¹Me dzó yaá mína é mam má á mfá ye ná míní nza kɔp obaa. ²Bá ye tsílán ya mína á besinagoga, akekwiñ ná tám da nzu ná, éñí aa ywiñ mína, aa ye tém ná aa vé Nzamá nkañann. ³Éde bá ye bɔ mam méte amú ná béé ndzí yem Tará ngé ki ma. ⁴Ve me dzó yaá mína é mam má, á mfá ná niané áwola deba é kwíñ yaá, míní síman ná maá kóbo ya mína ya mɔ.

Éséñ Mfúfúp Nsísim

Meé ndzí mína mɔ tára ádzó, amú ná me mbé me tɔɔ bíabe mína. ⁵Ve éndagá mé nga ke yaá ébe éñí a ngá lóm ma, mot enziñ ye ébe mína ñí áá síli ki ma ná, ‘Wa ke ó vé?’. ⁶Ve fáve ná eywiññ dá é dzéñ yaá mína mílém akála ná me dzó yaá mína é mam má. ⁷Ve dzam te édo ma kóbo mína bébélá ná, é ne mína ya abúánn ná me ke; amú ná ngé ma bɔ kaa áke, Mfoñ milém ñí áá ye fe sɔ ébe mína. Ve ngé me kéñ, ma ye mína ñí lóm.

⁸Éde éyɔɔ aa ye sian, aa ye bwaale bot á mfá nsémm, á mfá nzósoó, ya á mfá nkíkán misaɔ; ⁹ébe á mfá nsémm, amú ná báá bwíni ma; ¹⁰ébe á mfá nzósoó, amú ná ma ke ébe Tará, mína mínáá ye ki ma bera yén; ¹¹ébe á mfá nkíkán misaɔ, amú ná ntébosú ye éniñ dzí bé kík yaá ñí nsaɔ.

¹²Me ngén me belé abwiññ mam ye ádzó mína, ve míní sés mɔ ñɔɔ éndagá. ¹³Ve niané Nsísim, éñí a ne bébélá aa ye sian, éñe aa ye wulu ya mína á bébélá áse été. Amú ná áá ye kóbo ya é nguu dzeñ émyen, fáve ná aa ye kóbo édí áse aa wók, aa ye fe mína kat fwéñ ébe édí é ntɔɔ ná dá nzu. ¹⁴Éñe aa ye ma vé dúmá, amú ná aa ye ñɔɔ édí é ne áandam, a kat fe mína dɔ fwéñ. ¹⁵Ásesé Tará a belé é ne éewɔm; dzam te édo me dzó yaá mína dɔ ná, aa ñɔɔ édí é ne áandam a lére mína dɔ.

Yesus aa búlán ébe Tará

¹⁶Oyomm abóɔɔn tám mínáá ye ma yén, véa oyomm abóɔɔn tám afé, mína ye ma bera yén.

¹⁷Ané beyága benziñ béye béyága béñ bé ngá dzó bevóó ya ébá bevóó ná, “É dzam aa dzó dí, dá yíli á yá ná, ‘oyomm abóɔɔn tám mínáá ye ma yén; véa oyomm abóɔɔn tám afé, mína ye ma bera yén, ya fe ná, ‘amú ná ma ke ébe Tará?’” ¹⁸Dzam te édo bé ngá dzó ná, “Nzá dzam aa dzó dí ná, ‘oyomm abóɔɔn tám?’ Bíá yem ngúrá dzam aa kóbo.”

¹⁹Yesus ñí eé yem ná bá kómo ñí síli nsílí, éde a ngá dzó bó ná,

Ye é dzam dí édo mína kóbo mína ya mína, ná mé dzó ná, ‘Oyomm abóɔɔn tám mínáá ye ma yén; véa oyomm abóɔɔn tám afé, mína ye ma

bera yén'? ²⁰Ma kóbo mína bébélá ya bébélá ná, mína ye yi, ya fe átobo eywiññ, ve bot béye é sí ñí bá ye sán; mína ye tobo ya eywiññ, ve éywiññ denan dá ye veñan mesán.

²¹É tám miningá á nga byeñ yaá, aa wók mitéñ, amú ná áwola deñ é kwíñ yaá; ve niané mwán a byála yaá, éñe kaa fe síman mítéñ a mvá wók, akála mesán, amú ná a só yaá mwann mot éniñ. ²²Amvála te fe mína áwola dí, mína míní ntó fe eywiññ; ve ma ye mína bera yén, véa mílém myenan mí nga sán, mot enziñ ñí áá ye ki mína vea mésán menan. ²³Mos te, mínáá ye ma síli dzam enziñ. Ma kóbo mína bébélá ya bébélá ná, ngé míní dzaa Tará dzam enziñ, ya éyola dam, aa ye mína do vé. ²⁴Anzukwíñ áwola dí mína mínáá bé dzaa dzam enziñ ya éyola dam; dzaagán, véa mína ye ñoñ, á mfá ye ná mesán menan mé tobo ndzálánn abóm.

²⁵Me kóbo yaá ya mína é mam má á mikaná été, tám da nzu, éyoñ máá ye fe bera kóbo ya mína á mikaná été, ve fáve ná ma ye kóbo ya mína édí Tará éyéá été. ²⁶Mos te mína ye dzaa ya éyola dam, éde máá dzó mína ná ma ye yaglan ya Tará akála denan, ²⁷akála ná Tará émyen aa dziñ mína, amú ná míní dziñ yaá ma, míní bwíni yaá fe ná éñe maá só ébe Nzamá. ²⁸Maá só ébe Tará, me sian éniñ dzí; ve ma bera lík éniñ dzí, véa me kéñ ébe Tará.

²⁹Ané béyága beñ bé ngá dzó ñí ná,

Dággé! Éndagá éñe ó nga kóbo yaá ya bía éyéá été, kaa fe kóbo ya mikaná. ³⁰Éyoñ dzí éñe bí yem yaá ná wa yem mam mése, wáá yi ki ná mot enziñ á síli wa dzam, akála te édo fe bía bí bwíni yaá ya do ná éñe waá só ébe Nzamá.

³¹Éde Yesus ñí a ngá yalan ya bó ná,

Ye ná áwola dí édo míní nga bwíni yaá? ³²Dággán ná áwola dá nzu, é ntó fe, édí mína ye tobo myeann, kada mot mfá weñ émyen, véa míní lík ma etámm; ve ma me sés etámm, amú ná Tará a ne bía ñí. ³³Me kóbo yaá mína é mam má á mfá ye ná míní belé mvwaá ébe ma. Mína yén midzuúk ébe éniñ dzí, ve biññán nguu ná, me wún yaá éniñ dzí.

Méyaglán mé Nkálá mitómá Yesukristo

17 ¹Niané Yesus a ngá mana kóbo mam méte, éde a ngá bére mís á dzóp, eé dzó ná,

Á Tará, áwola é kwíñ yaá; vá é Mwán we dúmá, á mfá ye ná Mwán ñí á vé fe wa dúmá; ²amvála ané o vé yaá ñí nguu edzwéé ébe mot binam áse, á mfá ye ná á vé ébá bése o vé yaá ñí éniñ é ne mbéámbéa. ³Édo ná, éniñ é ne mbéámbéa édo dí ná, bé yem wa, wa etámm o ne ñá Nzamá, ya fe Yesukristo, éñí o ngá lóm. ⁴Me vé yaá wa dúmá é sí ñí, meé dzálá éséññ o ngá vé ma ná me bo. ⁵Éde

éndagá, á Tará, vá ma dúmá á mférŋ we wámyen ya é dúmá me mbé me belé bía wa ó mvús, kaa ná éniŋ dzí é bɔ.

Yesus aa yaglan ya beyága

⁶Ébe ébá o ngá vé ma éniŋ dzí, me lére yaá bɔ éyola dwe; bé mbé áabwe, éde o ngá vé ma bɔ, bá bé baale yaá fe éfiá dwe. ⁷Áwola dí bé yem yaá ná édí áse o vé yaá ma, dá sɔ ébe wa; ⁸amú ná me kee yaá bɔ é dzam áse o ngá kee ma; bé ñɔŋ yaá mɔ, bé yem yaá bɛbɛlá ná éñe maá sɔ ébe wa; bé bwíni yaá fe ná, wa waá lóm ma. ⁹Ma yaglan ákála deba; máá yaglan ákála éniŋ dzí, ve fáve ákála ébá o vé yaá ma, amú ná bé ne áabwe. ¹⁰Ásesé wɔm, a ne áawe, áadwe é ne áadam, ma me ñɔŋ yaá fe dúmá ébe ébɔ.

¹¹Meé sés fe éniŋ dzí, ve ébɔ bé ne éniŋ dzí, ma mé ŋga nzu yaá ébe wa. Á Mfúfúp Tará, ébe ébá o vé yaá ma, baalé bɔ ébe éyola dwe, á mfá ye ná bé bɔ mot mbɔɔ, ntéññ mbɔɔ ané bía wa. ¹²É tám me mbé bíabe bɔ, ébá o vé yaá ma, me ngá baale bɔ ébe éyola dwe, maá baale bɔ, mbɔɔ enziŋ ye ébe bɔ áá bé dzímle, fáve mwán ye á ntsamann, á mfá ye ná Ntsili ó dzálában.

¹³Ve áwola dí, mé ŋga nzu yaá ébe wa; ma mé ŋga kɔbɔ yaá fe é mam má éniŋ dzí, á mfá ye ná bé tɔbɔ ndzálánn abóm ya mɛsán mam ébe ébɔ bébyen. ¹⁴Me vé yaá bɔ éfiá dwe, éniŋ dzí dá é víni yaá fe bɔ, amú ná bé sés ébá béye éniŋ dzí, amvála ané ma me sés ki éñí éniŋ dzí.

¹⁵Máá dzaa ná ó vea bɔ éniŋ dzí, ve fáve ná ó baale bɔ mfá ye ébe mbéa mot. ¹⁶Bé sés ébá béye éniŋ dzí, ntéññ mbɔɔ ané ma me sés ki éñí ye éniŋ dzí. ¹⁷Télegé bɔ eki á bɛbɛlá été; éfiá dwe édo e ne bɛbɛlá. ¹⁸Amvála ané o lóm yaá ma éniŋ dzí, amvála te fe ma me lóm yaá bɔ éniŋ dzí; ¹⁹ma téle mámyen eki ákála deba, á mfá ye ná bá bé ne fe tébe eki á bɛbɛlá été.

Yesus aa yaglan ya ébá bá ye ke bá bwíni

²⁰Ve máá dzaa ákála ébá etámm, ve ya fe ákála ébá bá ye ma bwíni ya éfiá deba; ²¹á mfá ye ná bɛsesé bé bɔ mot mbɔɔ; amvála ané wa Tára o ne ébe ma, ma ébe wa, bá bé tɔbɔ fe ébe bía, á mfá ye ná éniŋ dzí é bwíni ná o lóm yaá ma.

²²É dúmá o vé yaá ma, ma me vé yaá fe bɔ dɔ, á mfá ná bé bɔ mot mbɔɔ ané bía bí ne fe mot mbɔɔ; ²³ma ébe bɔ, wa ébe ma, á mfá ye ná bé tɔbɔ ndzálánn éfulann été, ná éniŋ dzí é yem ná waá lóm ma, ya fe ná waá dziŋ bɔ ntéññ mbɔɔ ané o dziŋ yaá ma.

²⁴Á Tará! Ma kómo ná ébá o vé yaá ma, é vóm me tɔɔ, bá bé tɔbɔ fe ó véa ya ma, mfá ye ná bé yén é dúmá dam, édí o vé yaá ma; amú ná waá dziŋ ma kaa ná éniŋ dzí é tɔbɔ mvelann. ²⁵Á Tará a ne

nzósoó, afáŋbo ná éniŋ dzí deé ndzí wa áyem, ma me yem yaá wa; ébá bá bé yem yaá fe ná waá lóm ma. ²⁶Me vé yaá bó ná bé yem éyola dwe, ma ye fe bo ná bé yem do; á mfá ye ná édziŋŋ o ngá dzinŋ ma ya do, é tɔbo ébe bó, ma fe ébe bó.

Judas aa kuan Yesus

18 ¹Niané Yesus a ngá mana kóbo, ané a ngá kíkgán otoŋtónŋ Kedrón bábe báyága beñ, bé kéñ á mfá mbóó áyát, é vóm áfúp é mbé, a ñíi été bábe báyága beñ. ²(Judas, é mot a ngá kuan ñí, ñí a ngá yem fe vóm te, amú ná Yesus a ngá bo eé kóán ó weñ bábe beyága beñ abwiññ biyɔŋ.)

³Éde Judas a ngá ñɔŋ nsámá benzima ya méwasíli betébosú befára ya émá befariseo, ané a ngá ke ó weñ ya beláma, ya miduná, ya fe byém mélúmán.

⁴Véa Yesus ñí eé yem é mam mése mé nga nzu ñí ku áyóp, ané a ngá ke bó síli ná, “Mína dzéŋ nzá?”

⁵Éde bé ngá yalan ya ñí ná, “Bía dzéŋ Yesus mwann Nasareno.”

Ané a ngá dzó bó ná, “Ma ñí.” (Judas, éñí a ngá kuan ñí, á mbé bábe bot béte.) ⁶Éyɔŋ a ngá dzó bó ná, “Ma ñí,” éde bésesé bé ngá yit ó mvús, bé mana ku ósí. ⁷Véa éñe Yesus a ngá bera bó síli ná, “Nzá mína dzéŋ?”

Ané bá bé ngá yalan ná, “Bía dzéŋ Yesus mwann Nasareno.”

⁸Éde Yesus a ngá dzó ná, “Me dzó yaá mína ná, ma me ne ñí. Édɔ ná, ngé ma mína dzéŋ, líkgán ná ébá bé ke.” ⁹(A ngá dzó do á mfá ye ná éfíá a ngá kóbo é dzálában, ná, “Ébá o ngá vé ma, meé ndzí dzímle mbóó enziŋ ye éte.”)

¹⁰Véa éñe Simón Pedro a ngá vea nzwaokenŋ á mbé a belé, a baa óloá ntébosú befára, ané a ngá kíkgán ñí áló meyóm. (Oloá te ó mbé eyola ná Malko.) ¹¹Éde Yesus a ngá dzó Pedro ná, “Niigé nzwaokenŋ ábámm éte. Ye ná máá yian ñú é kóp Tará a vé yaá ma?”

Bá ke ya Yesus ébe Anás

¹²Dzam te édo nsámá bénzima, ya komandée, ya fe méwasíli bejudio, bé ngá biñ Yesus, bé mana ñí ká. ¹³Éde bé ngá tára ke ya ñí ébe Anás, amú ná a mbé Kaifas nkiá, éñí a mbé ntébosú befára ye á mbú te.

¹⁴(Kaifas te éñe fe ñí a mbé é mot a ngá lére betébosú béye bejudio ná, é ne mvéáñ ná mot mbóó éñe á wú akála nnam ngúrá.)

Pedro aa kat Yesus éyɔŋ ósúá

¹⁵Éde Simón Pedro a ngá ke aa bee Yesus bá nyága mbóó. (Ntébosú befára ñí a ngá yem fe nyága te, ané a ngá ñíi bá Yesus á yát ntébosú befára éte.) ¹⁶Ve Pedro ñí a mbé a téle á mbeñ ósí átán. Akála te édo nyága mbóó te, éñí ntébosú befára a ngá yem a ngá ke kóbo ya é miningá

a ngá kálá mbéñ, a bɔ Pedro ná á ñíí. ¹⁷Véa éñe mbo biséññ miningá te eé kálá mbéñ, éde a ngá dzó Pedro ná, “Nde wa o sés nyága mbóó ye béyága é mot ñí?”

Ané a ngá dzó ná, “Me sés ñí.”

¹⁸(Véa áloá ntébosú befára, ya mewasíli mé mbé mé téle ó véa, méé wók ndúán, éñí bé ngá mana koman, akála ná avép é mbé. Pedro ñí a mbé fe a téle bábe bó, eé wók ndúán.)

Bá síli Yesus misíli

¹⁹Dzam te édo ntébosú befára a ngá síli Yesus mfá béyága beñ ya fe ébe ayágalé deñ. ²⁰Ané Yesus a ngá yalan ya ñí ná, “Me ngá ke fe ma kóbo ya bot éyéá été. Eyɔɲ ése me ngá ke ma vé ayágalé á sinagoga, ya á templo été, é vóm bejudio bése bá kóán, meé ndzí kóbo dzam enziɲ ásweññ. ²¹Amú dzé ma wa síli do? Síligé é bot bé ngá wók é dzam me ngá kóbo bó. Dággé bot béte bá yem é dzam me ngá dzó.”

²²Véa Yesus ñí eé dzó mam méte, ané awasíli avóó ye édí é mbé é téle ñí bebeñ é ngá bími Yesus abeáñ ámánɲ, deé dzó ná, “Ye ná éñe wa yalan ya ntébosú befára néa.”

²³Éde Yesus a ngá yalan ya ñí ná, “Ngé mé dzími kóbo, léregé édí ye é ne abé. Vé ngé mé yem kóbo, akála dzé wa bími ma?”

²⁴Véa éñe Anás a ngá lóm ñí nkáán ébe Kaifas, ntébosú befára.

Pedro aa bera kat Yesus

²⁵Éde Simón Pedro ñí a mbé a téle eé wók ndúán, ané bé ngá síli ñí ná, “Nde wa o sés mot mbóó ye béyága beñ?”

Éde a ngá kat do, eé dzó ná, “Me sés éñe.”

²⁶Véa mot mbóó ye áloá ntébosú befára, éñí a mbé évúvúmán é mot Pedro a ngá kík aló a ngá dzó ñí ná, “Nde máá yén wa áfúp mína ñí?”

²⁷Véa éñe Pedro a ngá bera do kat, etéññ te ébyen ané nnóm kúp a ngá lóɲ.

Bé ne ya Yesus ébe Pilato

²⁸Véa éñe bé ngá kólo ya Yesus é ndá Kaifas, bé kéñ ya ñí á kpatéle (ákoan ná ekúná kírí é ntóó). Éde bébyen bé ngá bɔ kaa ñíí á kpatéle, ná bé ne dzí Paskua, á mfá ye ná bé nza kop mvin. ²⁹Véa éñe Pilato a ngá kwíñ átán, a kéñ é vóm bé mbé, a síli ná, “Nzá esómán míni belé ya do é mot ñí?”

³⁰Ané bé ngá yalan ya ñí ná, “Ngé é mot ñí á bɔ kaa ábo mbéa mot, ngé bíá nzu wa ñí ákee.”

³¹Véa éñe Pilato a ngá dzó bó ná, “Mína bébyen keɲán ya ñí, míni kík ñí misaɲ ámvála nkóó métsiɲɲ wenan wá dzó.”

Ané betébosú béye bejudio bé ngá yalan ya ñí ná, “Bíí belé filí ye ná, bí vé mot nsaɲ áwú.” ³²(Dzam te é ngá boban á mfá ye ná éfíá Yesus a ngá kóbo, é dzálában, eé lére nzá ámvála awú á mbé ná á nkún nzu wú.)

33 Véa éñe Pilato a ngá bera ñíi á kpatéle été, ané a ngá lwée Yesus, a síli ñí ná, “Ye wa ó ne é Kéza bejudio?”

34 Éde Yesus a ngá yalan ná, “Ye wa dzó do deé só ébe wámyen, ngé ki ná bot befé ébó bé dzó wa do, á mfá wóm?”

35 Véa éñe Pilato a ngá yalan ná, “Ye me ne mwann Judio? É bot bwe, bábe betébosú befára, ébó bé kee ma wa. Dzé ó bo?”

36 Éde Yesus a ngá yalan ná, “Édzwée ngómán dam é sés édí ye é sí ñí. Ngé édzwée ngómán dam é bo édí ye é sí ñí, ngé bebo biséññ bam bá lúman á mfá ye ná bé bo ma kaa kee é mó betébosú béye bejudio. Ve éndagá édzwée ngómán dam e sés édí ye ó vá.”

37 Véa éñe Pilato a ngá dzó ñí ná, “Dá yíli fá ná o ne kéza?”

Ané Yesus a ngá yalan ná, “Wa wa dzó ná me ne kéza. Dzam te édo me byála yaá ya do, akála te édo fe me só yaá do é sí ñí, á mfá ávé ngañiá ye édí é ne bébélá; éñí áse a ne bébélá mot aa wók é kíñj dzam.”

38 Éde Pilato a ngá síli ñí ná, “Dzé é ne bébélá?”

Niané a ngá dzó do, ané a ngá bera ke koan ya bejudio, a dzó bó ná, “Mää koan ya etóm enziñ ébe éñe. 39 Ve, dá é ntóó mína fúlú ná ó Paskua, bá vé mína mbok mbóó filí. Ye mína kómo ná me vé mína kéza bejudio filí?”

40 Véa éñe bé ngá bera yónán ná, “Se éñí te! Ve, Barrabás!” (Barrabás te ñí a mbé nzeé midzññ.)

Pilato aa kómo dzóo Yesus

19 ¹Tám te édo Pilato a ngá ñoñ Yesus á ñga yít fe ñí. ²Ané benzima bé ngá mana tsiñ korona kát biyóó bé bwára do Yesus á nló, bé bwára fe ñí mbamba étóp kéza; ³bé ñga yit ñí bebeñ, béé dzó ñí ná, “Á mbóló é kéza bejudio!” Béé bími fe ñí mebéáñ.

⁴Éde Pilato a ngá bera kwíñ átán, á dzó bó ná, “Dággán, ma nzu mína ya ñí átán, á mfá ye ná míní yem ná mää koan etóm enziñ ébe éñe.”

⁵Véa éñe Yesus a ngá kwíñ átán a бага korona kát biyóó, ya fe mbamba étóp kéza. Ané Pilato a ngá dzó bó ná, “Mot te éñe ñí.”

⁶Éde, niané betébosú befára ya mewasíli bé ngá yén ñí, bé ñga yón ná, “Dómlé ñí á krús! Dómlé ñí á krús!”

Ané Pilato a ngá dzó bó ná, “Mína bébyen ñoññán ñí, míní dómlé fe ñí á krús! Amú ná mää koan etóm enziñ ébe éñe.”

⁷Éde betébosú béye bejudio bá bé ngá yalan ya ñí ná, “Bí belé nkóó metsiññ, ya ámvála wá lére, aa yian wú, amú ná aa veñan émyen é Mwán Nzamá.”

⁸Niané Pilato a ngá wók effía te, á ñga dañ bera ko wóññ, ⁹ané a ngá bera ñíi á kpatéle, a síli Yesus ná, “O ne mot ye ó vé?” Ve Yesus ñí eé ndzí ñí vé eyalann.

¹⁰Véa éñe Pilato a ngá síli ñí ná, “Ye wää yalan ya ma? Ye wää yem ná me belé nguu edzwée á mfá ávé wa filí, ya fe ádómlé wa á krús?”

¹¹Ané Yesus ñí a ngá yalan ya ñí ná, “Wéé belé nguú enziŋ ye ábo ma dzam, ngé se éñe bá vé wa dɔ́ ó yóp. Ya dzam te édo, é mot á kee ma wa, éñe a belé nsémm wá dan.”

¹²Atéé ye véa, Pilato á ŋga dzéŋ ná á dzáma ñí. Ve betébosú béye bejudio bá bé ngá yónán ná, “Ngé o dzáma mot te, o sés fe Sesar mvwíññ! Éñí áse aa bɔ́ émyen Kéza, aa ke Sesar á ngamm áyát.”

¹³Éde, niané Pilato a ngá wók bifíá bíte, ané a ngá kwíñ ya Yesus átán, a kéñ tɔ́bo ósí é vóm bá kík misan, vóm te ó tɔ́ eyola ná “Ékaza Mekwá”, (á nkɔ́bo Ebreo ñí ya “Gabata.”) ¹⁴(A mbé é mos bá koman Paskua, bebeñ ané amyeré) Éde a ngá dzó bejudio ná, “Dággán, é kéza wenan éñe ñí.”

¹⁵Véa bejudio bá bé ŋga yónán ná, “Á wá! Á wá! Dómlé ñí á krús!”

Ané Pilato a ngá síli bó ná, “Ye ná me nzu dómlé é kéza wenan á krús?”

Éde betébosú befára bé ngá yalan ná, “Bíí belé kéza mfé, fáve Sesar.”

¹⁶Tám te édo a ngá kee bó ñí ná bé dómlé ñí á krús.

Bá dómlé Yesus á krús

Véa éñe be ngá ke ya Yesus. ¹⁷Éde a ngá kólo ó véa émyen a бага é krús deñ, eé ke é vóm bé ngá lwée ná, “Ékpékpéññ Nló” (bá dzó dɔ́ á nkɔ́bo Ebreo ná, “Gólgota”), ¹⁸é vóm bé ngá dómlé ñí á krús, éñe ya bot bé beañ befé, mbɔ́ɔ́ ngúrá mfá, Yesus ñí ya énzénzan.

¹⁹Éde fe Pilato a ngá tsili bora ntsili, a kele wo é krús Yesus áyóp. Ntsili te ó mbé ná, “Yesus Mwann Nasareno, é Kéza Bejudio”.

²⁰Véa, abwiññ bejudio dá daá lánj fe ntsili te, akála ná é vóm bé ngá dómlé Yesus á krús ó mbé bebeñ ya kísoan; ntsili te wá ó mbé fe á nkɔ́bo Ebreo, á nkɔ́bo Latín, ya fe á nkɔ́bo Griego. ²¹Véa éñe betébosú befára bejudio bé ngá dzó Pilato ná, “O táa tsili ná, ‘É Kéza Bejudio’, ve fáve ná a ngá dzó ná, ‘Me ne é kéza bejudio.’”

²²Éde Pilato a ngá yalan ná, “Édí me tsili yaá, édo é tɔ́bo yaá ntsilann.”

²³Véa, éyɔŋ benzima bé ngá dómlé Yesus á krús, ané bé ngá ñɔŋ bitóp byeñ, bé kap byɔ́ bifas bí nii, kada mwann benzima efas evɔ́ɔ́. Éde fe bé ngá ñɔŋ élíŋná. (Elíŋná te é mbé é belé olat ovɔ́ɔ́ atéé ye óyóp akekwiñ ósí, é tɔ́ nlatán ngúrá.) ²⁴Véa éñe bevɔ́ɔ́ bé ngá dzó ébá bevɔ́ɔ́ ná, “Bí táa dɔ́ ñap, ve fáve ná bí kyákán elíŋná te bema, ná bí yén dá ye bɔ́ édí nzá.” Édí te é mbé, á mfá ye ná Ntsili ó dzálában ná,

“Bébyen ya bébyen baá kaban bitóp byam,
baá kyak fe bema étóp dam áyóp.”

Dzam te édo benzima bé ngá bɔ́ dɔ́.

²⁵Véa bé mbé bebeñ á krús ná, Yesus ñiá, ya ñiá mwanñan, ya María éñí Kleofas, ya María Magdalena. ²⁶Niané Yesus a ngá yén ñiá ya nyága a ngá dziŋ bé téle bebeñ ó véa, ané a ngá dzó ñiá ná, “Á Miningá, dággé é

mwán we éñe ñí!” ²⁷Véa éñe fe a ngá dzó nyága ná, “Dággé ñuá éñe ñí!” Éde atée ye áwola te, nyága te a ngá ñɔŋ ñí é ndá dzéñ émyen.

Áwú Yesus

²⁸Nia véa, Yesus eé yem ná mam mése mé mana yaá tɔɔ nkɔkgán (á mfá ye ná Ntsili ó dzálában), ané a ngá dzó ná, “Ma wók evée.” ²⁹Éde kóp é mbé é téle ó véa, é tɔɔ ndzálánn ya é vino a ne saŋŋ. Ané bé ngá ñɔŋ efús etóp bé dum dɔ á vino te été, bé ká dɔ á ntɛŋ isopo, véa bé ŋga kee ñí dɔ ánu. ³⁰Niané Yesus a ngá ñú é vino a mbé saŋŋ te, ané a ngá dzó ná, “É tɔɔ yaá nkɔkgán!” Éde a ngá lwíi nló ósí, a kee nsísim.

Bá dzii Yesus akɔŋŋ ó mveañ

³¹Dá é tɔɔ ná, a mbé é mos bá koman Paskua. Betébosú béye bejudio bá béé ngá kómo ki ná mibim mí lígi á krús akekwiñ é mos Satará (amú ná é mos Satará te ó mbé bora mos). Éde bé ngá dzaa Pilato ná bé búk bɔ meɔ, bé vea fe bɔ ó véa. ³²Ané benzima bé ngá ke, bé búk méɔ éñí ósúá ya éñí mbɔɔ, ébá bé mbé bé ndómlán á krús bábe Yesus. ³³Niané bé ngá sian ébe Yesus, bé yén ná a wú yaá, éde bé ngá bɔ kaa fe ñí búk meɔ.

³⁴Ve mwann benzima mbɔɔ a ngá dzii ñí akɔŋŋ ó mveañ, ané mekií ya mendzímme bí ngá kwíñ etéññ te ébyen. ³⁵Éde éñí aá yén, a vé yaá dɔ ngañiá (é ngañiá weñ ñí a ne fe bébéla. Aa yem ná aa kɔɔ bébéla), á mfá ye ná mína míni bwíni fe. ³⁶Mam méte mé ngá bɔban á mfá ye ná Ntsili ó dzálában ná, “Éveés deñ enziŋ dáá ye tɔɔ mbúkɔgán.” ³⁷Éde Ntsili ofé wá wá dzó fe ná, “Bá ye dága éñí bé ngá dzii akɔŋŋ.”

Bá dzep Yesus ó sɔŋ

³⁸Niané mam méte mé ngá mana, ané é José ye Arimatea, éñí a mbé nyága Yesus ásweññ (akála ná a ngá kɔ betébosú béye bejudio wɔŋŋ, a ngá ke dzaa Pilato ná á kee ñí mbim Yesus. Éde Pilato a ngá yébe ñí dɔ. Ané a ngá nzu ñɔŋ, a kéñ fe ya mbim Yesus.

³⁹Ya fe Nikodemo, éñí a ngá tára ke áyén Yesus á alú, ñí a ngá sɔ fe, a belé mbwánn enum ó tɔɔ táŋ ané bekíl mewóm mé léa ya bekíl bé nii. ⁴⁰Véa éñe bé ngá ñɔŋ mbim Yesus, bé mana wɔ vígile bítóp été ya é byém byá num mvéañ, ámvála fúlú bejudio é ne á mfá ndzepbann bot. ⁴¹É vóm bé ngá dómle ñí á krús, áfúp é mbé ó véa, áfúp te été, mfefeñ sɔŋ ndá ákwá ó mbé, éñí e mbé ná báá bé tára dzep mot enziŋ été. ⁴²Véa, akála ná a mbé é mos bejudio bá koman, dá é tɔɔ ná sɔŋ da e mbé fe bebeñ, ané bé ngá dzep Yesus ó véa.

Yesus a ne ntétéá

20 ¹Ve é mos ósúá ye á sóánn María Magdalena a ngá ke á sɔŋ ekúná kíri, ákoan dzíbi é ngén, véa éñe a ngá yén ná akwá é ntɔɔ

nkólánn ó sɔŋ ndá ákwá. ²Ané a ngá ke mbíí ébe Simón Pedro ya nyága mbɔ́ɔ́, éñí Yesus a ngá dziŋ fe, éde a ngá dzó bó ná, “Bé vea yaá Ntí ó sɔŋ, bíá yem é vóm bé ke yaá ní bwíí.”

³Véa éñe Pedro bá nyága mbɔ́ɔ́ bé ngá kólo bé kéñ ó sɔŋ. ⁴Éde bé beañ béte bé ngá tée mbíí nsámá. Ané nyága mbɔ́ɔ́ te a ngá daŋ mára álot Pedro, éde a ngá tára ke kwíñ ó sɔŋ ndá ákwá. ⁵Ané a ngá lúnbe ná aa dága, véa éñe a ngá yén bitóp bí bóo, ve eé ndzí níí.

⁶Éde Simón Pedro níí eé bee níí, ané a ngá níí á sɔŋ ndá ákwá été, éde a ngá yén bitóp bí bóo, ⁷ya étóp é mbé é tsini Yesus á nló, dá é mbé é bóo mbom ngúrá mfá, ve se ya bitóp bí bí mbé mvígílán. ⁸Véa éñe nyága mbɔ́ɔ́, éñí a ngá tára sian á sɔŋ níí a ngá níí fe, éde eé yén a bwíni. ⁹(Ve amú ná ákoan bé ngén kaa áyem á Mítsili été ná, Yesus aa yian wómo míwúán été. ¹⁰Véa éñe beyága bé ngá bera búlán ébe ébá bevɔ́ɔ́.

Yesus aa yéne ósúsúa, ébe ású María Magdalena

¹¹Ve María níí a mbé a téle átán á sɔŋ á mféŋŋ eé yi. É tám a ngá yi néa, ané a ngá lúnbe, a níí á sɔŋ ndá ákwá été. ¹²Éde a ngá yén baáŋgel bé beañ bé бага mebwát mífúm, bé tɔ́ ósí é vóm Yesus a mbé a bóo, mbɔ́ɔ́ étun á nló yóp, éñí mbɔ́ɔ́ níí ya étun mébo. ¹³Ané bé ngá síli níí ná, “A miningá, akála dzé wa yi?”

Véa níí a ngá yalan ya bó ná, “Bé ke yaá Ntí wɔm, máá yem ki é vóm bé ke yaá níí bwíí.”

¹⁴Éde níí eé dzó dzam te, niané a ngá veŋan á mvús, a yén Yesus a ntéle, níí kaa áyem ná a ne Yesus. ¹⁵Véa éñe Yesus a ngá síli níí ná, “A miningá, amú dzé wa yi? Nzá wa dzéŋ?”

María níí eé tém ná a mbé mbaale afúp, éde a ngá dzó níí ná, “Á ndzwée, ngé wa ó vea níí, katge ma é vóm o ke yaá níí bwíí, véa ma ye níí ke ñɔŋ.”

¹⁶Ané Yesus a ngá dzó níí ná, “Á María!”

Éde níí a ngá veŋan á mvús, ané a dzó níí á nkóbo Ebreo ná, “Á Raboní,” (dá yíli ná, Nyágale.)

¹⁷Véa éñe Yesus a ngá dzó níí ná, “O táa ma nama, amú ná me ngén kaa ábét ébe Tará. Ve, kéŋ ébe bobédzaŋ, o dzó bó ná ma bét ébe Tará ya Ésusá wenan; ébe é Nzamá wɔm ya é Nzamá wenan.” ¹⁸Éde María Magdalena a ngá ke, a kat beyága fwéñ ná, “Me yén yaá Ntí!” Ané a ngá dzó bó é mam a ngá kóbo ya níí.

Yesus aa yéne ébe ású beyága beñ

¹⁹Mos te, niané ŋgɔ́ɔ́ e ngá kwíñ, é mos ósúá ye á sóánn, ákoan mibéñ mí dzií é vóm beyága bé mbé bé kóán ákála wɔŋŋ ébe betébosú béye bejudio. Véa énzénzaŋ deba éñe Yesus a ngá nzu sian á ntéle, ané a ngá dzó bó ná, “Mvwáá ya mína.” ²⁰Éde eé dzó do, ané a ngá lére bó mó ya mveañ. Véa, beyága bé ŋga sán niané bé ngá yem ná a ne Ntí.

²¹Éde Yesus a ngá bera b́ dzó ná, “Mvwaá ya mína. Ámvála Tará a ngá lóm ma, néa fe ma ma lóm mína.” ²²Niané a ngá dzó do, éde a ngá vúŋ, eé dzó b́ ná, “Ñṵṵṅán Mfúfúp Nsísim. ²³Ébá bése mína dzwii misémm, mí ntóḃ b́ ndzwiiann. Éñí áse ñí mína biñ myo, mí tɔḃo yaá mbiñann.”

Yesus bá Tomás

²⁴Ve Tomás, nyága mbóó ye béyága awóm ya bé beañ (éñí bé ngá lwée ná Mbyás), éé mbé bábe b́ éyɔŋ Yesus a ngá sian. ²⁵Véa éñe béyága bevóó bé ngá dzó ñí ná, “Bí yén yaá Ntí!”

Ve ñí a ngá dzó b́ ná, “Ngé ma kaa áyén ávéŋŋ mesén é mó meñ, me nii fe ónuú wɔm ávéŋŋ mesén, é wéá wɔm wá me nii fe ó mveañ deñ, mãá ye ki do yébe amvála enziŋ!”

²⁶Éde nia melú mmom, ákoan ná beyága bé bera yaá tɔḃo fufúlu á ndá été, Tomás ñí a tɔḃ fe bábe b́, mibéñ myá mí tɔḃ fe ndzibann. Véa énzénzanŋ deba éñe Yesus a ngá nzu sian á ntéle, éde a ngá dzó ná, “Mvwaá ya mína.” ²⁷Ané a ngá dzó Tomás ná, “Niigé ónuú we ó vá, dággé fe é mó mam. Nzaá ya é wéá we, o nii wó é mveañ dam. Kaa áḃo éñí a ne kaa ábwíni, ve fáve ná bwíniŋé!”

²⁸Éde Tomás a ngá dzó ñí ná, “Á Ntí wɔm ya é Nzamá wɔm!”

²⁹Véa Yesus ñí a ngá síli ñí ná, “Ye wa bwíni amú ná o yén yaá ma? Abwará ya ébá bé ngá b́ kaa áyén, ve bé bwíni.”

Bá lére akéá ye ábá dí

³⁰É ne été ná Yesus aá b́ fe abwiññ mendem afé ébe ású deba béyága beñ, ná mé sés ntsilann ábá dí été. ³¹Ve é má mé tɔḃo yaá ntsilann, á mfá ye ná míní bwíni ná Yesus éñe a ne Kristo, é Mwán Nzamá; ya ná míní bwíni, míní ne belé éniŋ ébe éyola deñ.

Yesus aa yéne ébe béyága zanḃbéá béye áabeñ

21 ¹Nia véa, ané Yesus a ngá bera yéne ébe béyága beñ á máŋ méye á Tiberias. Éde a ngá yéne ámvála dí; ²bé mbé vóm mbóó ná, Simón Pedro, ya Tomás (éñí bé ngá lwée ná Mbyás), ya Natanael (mot ye á Kaná ye á Galilea), ya ébá Zebedeo, ya beyága Yesus bé beañ befé. ³Véa éñe Simón Pedro a ngá dzó b́ ná, “Ma ke míyén mí kwaás!”

Ané bá bé ngá dzó ñí ná, “Bía bía ke fe bíabe mína.” Éde bé ngá ke bé daŋ á byéa été. Ve alú te ébó kaa áywiñ dzóm enziŋ.

⁴Éde, éyɔŋ kíri e ngá ke da léne, Yesus á ntéle á nsá máŋ; ve beyága ébó kaa áyem ná Yesus éñe ñí. ⁵Ané Yesus a ngá síli b́ ná, “Á bóŋŋ, ye míní belé ayomm kwaás enziŋ?”

Éde bé ngá yalan ya ñí ná, “Kaa.”

⁶Éde a ngá dzó b́ ná, “Weagán avwát mfá meyóm mé byéa, mína ye biñ.”

Ané bé ngá wea do, ébó kaa fe ya nguú ye ádule do, amú abwiññ kwaás.

⁷Véa éñe, nyága Yesus a ngá dziŋ a dzó Pedro ná, “A ne Ntí!” Niané Simón Pedro a ngá wók ná a ne Ntí, á nga kom elíŋŋá, (akála ná a mbé kaa do), véa éñe émyen a ngá wea ñúú óswiñ. ⁸Ve béyága bevóó bá bé nga bee ñí á byéa été, béé nzu bá dulu avwát é tóó ndzálánn ya kwaás, amú ná bée mbé sí oyaáp, ve fáve ané táŋ ntet bemetro.

⁹Véa, niané bé ngá síis ó sí, bé yén mekak mé ndúán mé tóó nkomann, kwaás e bóo mo áyóp ya mfémm. ¹⁰Ané Yesus a ngá dzó bó ná, “Nzaán ya ma ya kwaás ye éñí míní ndem áywiñ.” ¹¹Éde Simón Pedro a ngá dan á byéa, á nga dulu avwát ó sí, é tóó ndzálánn ya bora bé kwaás, táŋ ntet kwaás ya kwaás mewóm mé tán ya kwaás é léa (153); afáŋbo ná kwaás e mbé ededeá abwiññ, avwát deé ndzí ñaba.

¹²Ané Yesus a ngá dzó bó ná, “Nzaán ádzí!” Nyága enziŋ eé ndzí nzomo ná a síli ñí ná, “O ne nzá?” Amú bé ngá yem ná a ne Ntí. ¹³Véa éñe Yesus a ngá só, a twáa mfémm, a kee bó wo, amvála te fe a ngá bo ya kwaás. ¹⁴Édí te édo é mbé éyóŋ léa Yesus a ngá yéne ébe béyága beñ, ákoan ná a wómo yaá míwúán été.

Yesus bá Pedro

¹⁵Éde, niané bé ngá mana dzí, ané Yesus á ngá síli Simón Pedro ná, “Á Simón é mwán Juan, ye wa dziŋ ma álot ébá?”

Éde a ngá dzó ñí ná, “Áá, á Ntí wa yem ná ma dziŋ wa.”

Ané Yesus a ngá dzó ñí ná, “Baalé mítómá myam!”

¹⁶Éde a ngá bera ñí dzó éyóŋ beañ ná, “Á Simón, é mwán Juan, ye wa dziŋ ma?”

Ané a ngá yalan ya ñí ná, “Áá, á Ntí, wa yem ná ma dziŋ wa.”

Éde Yesus a ngá dzó ñí ná, “Tugá baale mítómá myam!”

¹⁷Ané a ngá bera ñí dzó éyóŋ léa ná, “Á Simón é mwán Juan, ye wa dziŋ ma?”

Véa éñe Pedro a ngá tóbo ya eywiññ, amú Yesus a ngá bera ñí síli éyóŋ léa ná, “Ye wa dziŋ ma?”

Éde a ngá yalan ya ñí ná, “Á Ntí, wa yem do ásesé. Wa yem ná ma dziŋ wa.”

Ané Yesus a ngá dzó ñí ná, “Baale é bwann mítómá bam. ¹⁸Ma dzó wa bébélá ya bébélá ná, éyóŋ ó mbé ndómán, o ngá bwára wámyen, o ngá wulu fe é vóm wa kómo. Ve eyóŋ ó ntóó nnomm, wa ye sám bínam bywe, véa mot mfé éñe aa ye wa bwára byém, éñe á nga ke ya wa é vóm wáá kómo.”

¹⁹(A ngá dzó dzam te ná, aa lére nzaá ámvála awú Pedro aa ye wú ná aa vé Nzamá dúmá.) Niané a ngá dzó do, véa éñe a ngá dzó ñí ná, “Beegé ma!”

Yesus bá nyága weñ a ngá bíra dziŋ

²⁰Éde Pedro a ngá veŋan a yén nyága Yesus a ngá dziŋ eé bee bó (éñí a mbé a yága Yesus ó twíñ, éñe fe á ngá síli ñí ná, “Á Ntí, nzá aa ye wa kuan?”, éyɔŋ bé ngá dzí bidzí bíye alú.) ²¹Éde niané Pedro a ngá yén ñí, véa éñe a ngá dzó Yesus ná, “Á Ntí, éñe ñí á yá?”

²²Ané Yesus a ngá yalan ya ñí ná, “Dzé é ne wa été? Ngé ma kómo ná á lígi a tɔ́ akekwiñ é tám ma ye sɔ́. Wa, beegé ma!” ²³Ya dzam te édo, édí te é ngá mana ñeŋ énzézaŋ bɔ́bédzaŋ ná, nyága te áá ye fe wú. Ve Yesus ñí eé ndzí ñí dzó ná, áá ye wú; ve fáve ná, “Ngé ma kómo ná á lígi a tɔ́ akekwiñ é tám ma ye sɔ́, dzé é ne wa été?”

Édí dá súgan

²⁴Nyága te éñe aa vé é mam má ngañiá, éñe fe aá tsili do; bía bía yem fe ná é ngañiá weñ a ne bebélá.

²⁵Éde, abwiññ mam afé dá é ne fe ná, Yesus aá bɔ́, é má mé ne ná ngé bé tsili kada dzam ye été, ma tém ná atwaa eniŋ ngúrá ébyen dá dǎé mbé ki kɔ́k ábím m mítsili míte.